

HISTOIRE ADMIRABLE
DE LA MALADIE
PRODIGIEUSE DE
PIERRE CREVSE, ARRIVEE
en la Ville de Niort:

*Avec un Plaidoyé de l'Aduocat du Roy
de ladite Ville sur le subiet de ladite
maladie, & la sentence interue-
nue sur ledit Plaidoyé: Ensem-
ble les certificats des Me-
decins & Chirurgiens
dudit lieu.*



39455

M. DC. XXX.

HISTOIRE ADMIRABLE
DE LA MALADIE
PRODIGIEUSE DE
PIERRE CRAVÉE, ARRIVÉE
en la Ville de Niort:

Avec un Plaidoyé de l'Advocat du Roy
de ladite ville sur le Juyce de ladite
maladie & la sentence interve-
nue par ledit Plaidoyé. Ensem-
ble les certificats des Me-
decins & Chirurgiens
dudit lieu.



1645

ADVERTISSEMENT AU LECTEUR.

A My Lecteur, ie m'assure bien que si tu prens la peine de considerer toutes les circonstances de ceste Histoire dont ie te fais part, que tu m'aduoueras quelle est aussi remarquable qu'aucune autre que tu ayes veüe de cette nature. Je ne t'en donne qu'un simple extrait, dans lequel ie me suis restraint au moins de paroles qu'il m'a esté possible. Je souhaite, & de tout mon cœur, que quelque bon esprit plus à soy que le mien, entreprenne de mettre l'histoire tout au long avec les commentaires necessaires pour faire voir les choses plus particulieres. Car tu trouueras icy de quoy t'esmerueller, lors que tu verras un enfant priué de tous ses sens & sans cognoissance, bref comme mort, faire, dire, & escrire des

choses qu'il n'auoit iamaïs veuës ny ap-
 prises, & qu'il n'eust sceu faire en plaine
 santé, & dans la libre disposition de son
 corps & de son esprit. Tu remarqueras en-
 cores, que les plus particulieres questions
 qu'on fait des sorciers, se peuuent traiter
 en ceste histoire. Ce seroit esclairer le So-
 leil, que de vouloir chercher du tesmoi-
 gnage pour t'asseurer de sa verité: les
 actes publics forceroient ta creance, quand
 elle seroit contraire, & tu n'en douteras
 plus, lors que ie t'auray dit qu'elle est arri-
 uée dans Niort Ville de Poictou, assez
 connue en France & es provinces estran-
 geres à cause de ses foires Royales, & du
 temps de ce memorable siege de la Rochel-
 le, dont le succez est un miracle, aussi
 bien que celuy que tu vas voir.

HISTOIRE ADMIRABLE
DE LA MALADIE PRODIGIEVSE
de Pierre Creusé.

Du 28. Ianuier 1628.

PIERRE Creusé aagé de treize ans dix mois, fils d'Anthoine Creusé marchand à Niort, passant par la halle de ladite Ville, le vingthuietiesme iour de Ianuier mil six cens vingt huit, sur le soir, tomba dans la rue priué de tous ses sens, & comme mort, fut relevé de ceux qui se trouuerent les plus proches de luy, & emporté en la maison de son pere qui n'estoit pas beaucoup esloignée, Messieurs le Goust & Marfac Docteurs en Medecine & Maistre Ferré Chirurgien, appelez pour secourir cet enfant, le trouuerent estendu sur vn liét sans aucun mouuement, & le corps tout

roide : apres auoir esté demie heure en cet estat, il fut trauaillé de conuulsions extraordinaires, la teste se courbe en arriere vers ses talons, & son ventre s'esleuant en haut monstre tout le corps en arc; tantost la teste s'eslançoit vers les pieds, & les bras se ployans en dehors faisoient au coude vne reflexion contre nature, tantost apres auoir iette violement la teste à droict & à gauche, la tournoit en rond sur son col : ces mouuemens estranges furent suivis de ceux-cy. Les paupieres demeurans immobiles & closes, les sourcils par plusieurs fois se haussioient & baissioient, & les leures se renuersans en dehors, la langue se mouuoit au dedans d'une vitesse incroyable, ayant eu iusques alors les yeux fermez, il les ouurit fort affreusement, & les tenans vn peu de temps fixes & sans cligner, les vint à tourner en rond d'un mouuement incroyable : tout le corps fut es-

meu de ces accidens, les bras & les iam-
 bes luy trembloient, & son ventre se
 haussoit & baissoit comme si quelqu'un
 par dessous l'eust poussé dehors & attiré
 en dedans. Toutes ces actions se suiui-
 rent sans relasche, & iâmais en toute sa
 maladie il ne s'en fit deux en mesme
 temps. Dans ses accez, cet enfant estoit
 sans fiebure, sans cognoissance, sans iu-
 gement: & priué de tous ses sens naturels,
 il n'oyoit point bien qu'on criast à haute
 voix près de ses oreilles, ne sentoit point
 bien qu'on le pinçast, ne voyoit point
 bien qu'il ouurist les yeux, lesquels on
 touchoit sans qu'il les fermast, voire
 estoient si durs qu'ils ne cedoient point à
 l'attouchement des doigts. L'enfant
 ayant esté quatre heures dans ces tour-
 mens sembla dormir, & peu de temps
 apres reuint à soy se plaignant d'auoir
 enduré de grandes douleurs, inuoquant
 Dieu, & priant ses pere & mere & les

autres assistans d'estre tousiours pres de luy & le garder.

Du 29. Ianuier.

LE lendemain vingtneufiesme iout de Ianuier à la mesme heure, l'enfant retomba en son mal avec les mesmes symptomes & accidens. On appelle les Medecins & le Chirurgien qui l'auoient veu le iour precedant, lesquels iugeant, qu'outre les causes ordinaires qui engendrent les conuulsions il y auoit quelque malignité vaporeuse qui agile & prompte parcouroit ainsi prestement toutes les parties du corps, ordonnerent vn remede pour l'euacuation de telles humeurs: le patient ne l'eust plustost pris qu'il luy suruint vne suffocation dans la gorge apparemment causee d'une effluëction, & laquelle cessa par l'application de vantouses seiches. Le remede pour son operation fit sortir quantité
d'humeurs

d'humeurs fort fetides & puantes, par là descharge desquelles on esperoit que la cause de la maladie fust aussi sortie, mais l'enfant ne tarda gueres à retomber en son mal, & ses accez mesmes furent plus grands & violens qu'auparauant : il commença à se plaindre, & iettant des cris effroyables & inarticulez tomba par terre, & priué de sentiment comme il auoit fait en son premier accez, & avec les mesmes actions, car en chaque paroxisme elles s'entresuiuoient tousiours & en mesme ordre. L'enfant fut quatre iours entiers sans auoir entre les accez vne heure de relasche, non pas mesme quelquesfois vn quart d'heure, qui estoit peu de temps pour subuenir à ses necessitez. Ces quatre iours passez le mal cessa entierement, & le malade eut du repos enuiron onze iours : cecy ayant esté remarqué en toute la maladie, que quand l'enfant estoit vn iour entier sans estre

tourmenté, il en passoit onze fans que le mal le reprist.

Du 12. Feurier.

CE iour sur les quatre à cinq heures du soir, ce pauvre enfant, après des bourdounemens d'oreille, douleurs de teste indicibles, & grincement de dents, fut faisi du mesme mal dont il auoit esté affligé, & sembla que le relasche qui luy auoit esté donné, n'estoit que pour le préparer à souffrir d'auantage : l'accez de ce iour fut du tout semblable aux precedens, dura trois heures, & l'enfant reueni à soy s'escria plusieurs fois, *Ha, mon Dieu, secourez moy! Ha, les meschantes gens!*

Du 13. Feurier.

LE lendemain l'enfant souffrit quatre acciez qui s'entresuiuirent de fort pres, chacun de trois heures & de-

mie, & la nuit suivante son mal augmentant, il survint de nouveaux accez: & est à remarquer en ceste prodigieuse maladie, qu'il aduint tousiours à chaque paroxisme quelque chose d'extraordinaire. Nous nous arresterons seulement aux particularitez plus remarquables. En ceste nuit l'enfant ayant demeuré quelque temps sur son liét, s'essance pour se ietter en terre, on tasche de le retenir, mais en vain: comme il fut sauté en la place nud en chemise, il commence à marcher par la chambre, priué de tous ses sens, & les yeux clos, ce qui estonna grandement ceux qui estoient presens, qui admirans vne chose si estrange le laisserent faire, prenans garde à luy, depeur de quelque accident, & à eux-mesmes, car si l'enfant rencontroit quelqu'un, il le fraploit à coups de pieds & de poings. Il n'y eut rien en cet accez, ny en quelques autres qui suivirent, qui

merite d'estre inferé dans ceste histoire, seulement n'oublirons-nous pas que l'enfant reuenu à foy nioit en pleurant à chaudes larmes auoir vsé de violence enuers ceux qui auoient soin de luy. Veule temps & ses actions extraordinaires, on le fit vestir de ses habits, & demeura vestu nuit & iour pendant son mal, & son pere commit deux personnes pour le garder & conduire, mais il les contrainoit de le laisser en liberté, les excédans si elles luy resistoient: ce iour autant de fois qu'il reuint à foy, il dit tousiours qu'il venoit de fort loing, & qu'au lieu où il se trouuoit, il y auoit des personnes qui le tourmentoient cruellement, & qu'il ne sçauoit qui elles estoient: ainsi se passerent plusieurs accez de trois, quatre, cinq, six & sept heures avec les mesmes accidens.

Des 14. & 15. Feurier.

LE quatorziesme sur les huit heures du soir l'enfant commença d'entrer en son trauail ordinaire, il saute en place de dessus son liect où il estoit, & les bras roides, bien que pendans, se promene d'un pas assez vifte enuiron vne heure & demie: les forces luy defaillans, il tombe à terre, d'où releue & mis sur son liect, il demeura immobile plus de sept heures, iettant par interualles des cris espouuentables & inarticulez. Sur les cinq heures du matin il se iette encore en place, où apres vne assez longue & lente promenade, il sembla prendre quelques nouuelles forces, & comme s'il eust apperceu quelque chose, il lançoit force coups de poings pour frapper ce qu'il luy sembloit voir, reculant par apres en arriere, comme s'il eust eu en teste quelque ennemy qu'il eust crainct.

Cet accez qui dura quinze heures entieres, cessa sur les onze heures du lendemain quinziesme Feurier, ayant à peine le pauvre enfant repris les esprits, & commencé de prendre son repas, le voila dans vn bien plus violent accez que le precedent: il frappe tout ce qu'il rencontre, il luy est aduis qu'il voit quelques personnes, & faisant la mouë s'approche d'elles à poings fermez pour les gourmer, prend ce qu'il peut rencontrer, & le va ietter au lieu où il s'imagine que sont les ennemis. Quelques fois on eust dit que quelqu'un luy retiroit les bras, & alors comme cedant à vne plus grande force, se plioit en vn ploton la teste entre les cheuilles des pieds, & tenant ses iambes avec les mains se promenoit sur la teste & sur la plante des pieds, & enfin demeurant en vn lieu se mit à crier espouventablement, comme si quelqu'un luy eust tors les bras.

Ces tourmens cessez , l'enfant change de posture, & apres quelques tours de chambre, ostant son bonnet & le tenant de la main gauche, fit les actions d'une personne qui veut saluer quelque compagnie, puis marchant vers le bout de la chambre, sembla prendre quelque personne par la main pour la mener danser, & de fait dança une gaillarde : apres l'auoir remerciee de bonne grace, en prend une autre qu'il fait pareillement danser, & ainsi iusques à sept fois, comme s'il y eust eu sept diuerses personnes. Ce qui fut trouué admirable : car premierement cet enfant auoit les yeux clos, & priué de tous les sens il marchoit seurement : Secondement il n'auoit iamais appris à danser, & ne sçauoit pas seulement faire la moindre desmarche, & toutesfois ne dansant iamais une mesme danse deux fois de suite, il dançoit avec les sauts mesures & cadences com-

me le meilleur maistre du monde.

Les danſes finies l'enfant faiſant la reuerence, comme diſant Adieu à la compagnie qui ſe departoit, s'inclina par ſept fois, comme ſi ces balladines, qu'il ſ'imaginoit voir, fuſſent ſorties les vnes apres les autres, & remettant ſon bonnet ſur ſa teſte & les mains ſur ſes coſtez, ſe promena aſſez long temps par la chambre avec des deſmarches graues & ſerieuſes, puis s'arreſtant tout court, oſte ſon bonnet, le met ſous ſon bras, & les deux mains iointes leuees au Ciel & la face en haut ſembloit prier Dieu, & s'eſmeut grandement en ceſte action, remuant par fois ſes bras, deſioignans & reioignans les mains, & priant avec ardeur & vehemence. Ces prieres ayant duré vne demie heure, il remet ſon bonnet, & taſſonnant tout à l'entour de la chambre on euſt dit qu'il taſchoit à ſortir de quelque lieu obſcur : il s'approche

che du feu, & s'alloit ietter dedans si on ne l'eust empesché. S'arrestant en vn instant, il aduance la teste, puis se tournant comme vers vne compagnie de sept personnes qui entroient, les salue en les baissant les vnes apres les autres: en fin lassé de tant de fatigue, on pensoit qu'il s'en allast tomber, mais s'esuertuant aduença vers l'une de ces personnes, & faisant la reuerence la prend par la main, & dansa vne volte avec elle, & s'adressant à vne autre pour la prendre, à voir ses gestes, l'on iugea que ceste seconde le refusoit: & de fait, apres l'auoir priée en vain par deux ou trois fois, ouurant la main fit l'action d'une personne qui en souffleteroit vne autre de toute sa force, puis haussant le nez comme par mespris, il passa à vne troisieme; & ainsi à toutes les autres qu'il traita comme la seconde. En fin comme si celles qui auoient esté frappees se fussent esleuees pour le bat-

tre, se met en posture pour se deffendre, mais se sentant trop foible pour resister, court vers vn bout de la chambre, & peu s'en fallut qu'il ne se heurtast: & arriua que celuy qui se mit au deuant de luy pour le garentir, fut traitté comme ennemy. En vn instant l'enfant changeant de contenance, la teste nue, esleua ses mains iointes vers le Ciel, & frappant d'une main sa poictrine, tenant l'autre haute & ouuerte, tombe à terre comme mort, & incontinent apres prenant vne de ses iambes de son bras droit se roula iusques au bout de la chambre, & se tournant sur le dos demeura long temps immobile, on le leue de terre pour le mettre sur son liët, mais sans mouuoir aucune partie du corps. Cet accez ayant duré seize heures, l'enfant apres auoir beaucoup souffert, commença à reuenir à soy, iettant des cris espouuentables avec des torsemens de bras & de iambes,

puis s'esleuant sur ses pieds se mit à se plaindre, & à dire, *Hé, mon Dieu, mon Dieu ayde moy! Iesus mon Dieu, secours moy: bon Dieu, les meschantes gens: bon Dieu, vueille auoir pitié de moy, s'il te plaist.*

Comme on luy demanda d'où il venoit: il respondit d'un lieu noir & tenebreux, où il y auoit sept femmes forcieres qui dansoient tousiours, & vn vieillard qui iouoit du violon: que ces femmes le contraignoient à danser, mais qu'il y en auoit deux de ces sept, qui luy faisoient bien du mal luy tordant les bras & les iambes, quand il refusoit de faire ce qu'elles vouloient: qu'il ne les pouuoit recognoistre, pource qu'il faisoit trop noir en ce lieu-là: & dit aussi qu'il auoit eu du relasche en ses tortures par le moyen d'un homme qui lardant vn lapin, estoit venu appeller ceste femme, qui l'auoit laissé seul en ceste

obscurité, & d'où il n'auoit peu sortir, bien qu'il eust cherché la porte de tous costez.

On prit le temps de cet interualle pour le faire manger, mais acheuant son repas le mal lereprend, commençant à l'ordinaire par vne grande douleur de teste, & se mettant en vn ploton, roule plusieurs tours de chambre, puis s'arrestant coy se releue droit, & ioignant les mains pour prier, les esleue en haut. On vid que malgré luy, qui les ferroit le plus fort qu'il luy estoit possible, elles se desioignoient par fois, comme si quelqu'un par force l'eust voulu empescher de prier Dieu: apres ceste action, il retombe derechef comme mort, & peu de temps apres reuenant à soy s'escria, entremellant ses paroles de beaucoup de souspirs, *Mon Dieu, ayde moy, s'il te plaist: bon Dieu, Iesus mon Dieu, secours moy: ha, les meschantes*

gens! bon Dieu, les meschantes gens.

On luy demande encore d'où il venoit : il respond comme auparauant, d'un lieu noir, vilain & affreux : adioutant qu'il estoit plein de poisons, & que ses habits en estoient tous salles & gastez, qu'il auoit esté tant battu qu'il n'en pouuoit plus, qu'on l'auoit mis en un ploton, & que s'il se fust remué, il eust esté assommé. Interrogé pourquoy il y alloit : *Je m'y trouue*, respondit-il, *Et ces meschantes gens m'attendent tousiours là : il n'y en a que deux qui me font tousiours du mal :* disant que c'estoit la mere & la fille, d'autant qu'il y en auoit vne plus grande & beaucoup plus vieille que l'autre, & qu'il l'auoit iugé par les doigts : que l'obscurité du lieu l'auoit empesché de les pouuoir cognoistre, ioint que quand il les vouloit considerer, elles se cachotent le visage des mains, de peur d'estre recognees, qu'elles auoient des

couurechefs blancs qui paroissoient aucunement dans l'obscurité: que pour les autres il ne s'en pouuoit plaindre, & qu'un vieillard fort difforme, ayant la barbe grise, iouoit du violon, & les faisoit danser. Il mangea durant ce relasche d'un grand appetit, mais son repas ne fut pas plustost finy, que le voila dans son accez, & criant la teste, tomba à terre sans sentiment: on le mit sur son liect, où ayant fait plusieurs actions estranges, s'efforce d'arracher un pauillon qui estoit dessus: ce que n'ayant pù, il le prend à deux mains le plus haut qu'il peut, & y portant ses genoux grimpe iusques au haut d'une vitesse incroyable, heurte de la teste le plancher s'efforçant de passer outre. Il redescend, se promeine dans la chambre, renuerse ce qu'il peut attrapper. Tout à coup il luy semble voir les sept femmes qu'il auoit desia fait danser: il s'aduançe, & les saluant

de bonne grace iufques au nombre de fept, les baifa toutes ; puis leur ayant fait vne reuerence en general, fe retire à vn bout de la chambre comme pour prendre aduis de quelqu'un, car ostant fon bonnet & preftant l'oreille, il fait vn figne de la teſte comme difant, Je le feray: & s'aduançant vers le lieu où il auoit ſalué les ſept femmes, en deſignoit vne du doigt, comme demandant, Eſt-ce celle-là? & monſtrant ainſi la ſeconde & la troiſieſme, s'arreſta à la quatrieſme, comme ſi on luy euſt dit, C'eſt celle-là: avec laquelle ayant danſé, & paſſant pour en prendre vne autre, prend le meſme conſeil, danſe avec celle-là vne ſarabande, faiſant claquer ſes doigts comme il euſt eu des caſtagnettes. Au dire de tous ceux qui eſtoient preſens, iamais baladin qui n'a fait autre choſe, ne fit mieux: il les fit ainſi danſer toutes ſept ſans reïterer deux fois vne meſme danſe,

prestant tousiours l'oreille, & deman-
 dant aduis: & combien que la chambre
 fust garnie de beaucoup de meubles, &
 que cet enfant eust des mouuemens si
 vifs & si prompts, quoy qu'il eust les
 yeux clos & fermez, iamaïs pourtant il
 ne heurta contre aucune chose. Il se mit
 en cholere, & en suite de ces actions, &
 haussant le nez & repoussant de la main
 donna plusieurs coups de poings en l'air,
 comme frappant quelqu'un, & puis
 reculant, comme s'il eust esté le plus foi-
 ble, se courbe par terre, se ploye le corps,
 iettant des cris horribles. D'autres mou-
 uemens suivirent ceux-là, il cheminoit
 sur la teste & sur les deux pieds, quel-
 quesfois sur la teste & sur les deux ge-
 noux, faisant en ceste posture plusieurs
 tours de chambre: puis changeoit d'a-
 ction, & touchant le paué de l'extremi-
 té du poulce & du doigt iudex, & te-
 nant ses deux bras roides estendus, il pas-
 soit

soit la teste & les espaules entre deux,
 s'eslançant son corps par dessus par vn
 admirable tour de souplesse, faisant ain-
 si le tour en arriere & en auant sans re-
 muer les quatre doigts du lieu où pre-
 mierement il les auoit posez : en fin en
 s'estendant tout de son long le visage en
 haut comme mort, il se mit à ramper sur
 le dos comme feroit vn serpent par ex-
 tension & contraction : les iambes ti-
 roient les cuisses, les cuisses le corps, le
 corps la teste, & s'estant traîné ainsi ius-
 ques au bout de la chambre, par vn
 mouuement contraire il retourne en ar-
 riere, la teste tiroit le corps, le corps les
 cuisses, les cuisses les iambes : outre ces
 mouuemens, il fut encore trauaillé de
 tous ceux qu'il auoit eu dans les prece-
 dens paroximes. Tout cecy arriua en di-
 uers accez, suruenant tousiours en cha-
 cun d'iceux quelque chose d'extraordi-
 naire.

Du 28. Feurier.

AV matin de ce iour ce pauvre enfant eut les mesmes visions, & dança comme le iour precedent avec les mesmes plaintes & les mesmes cris. Il s'assit dessus son liect, remuant les doigts comme s'il eust ioué de l'espinette, puis se promenant par la place, l'on iugea que les balladines estoient arriuees pour tenir le bal, mais qu'il se moquoit d'elles: car s'arrestant pour les compter, & n'en marquant que six avec le doigt, & n'en trouuant plus grand nombre apres les auoir recomptees, leur leue le nez, & s'enfuit: mais arresté, le voila de-rechef gesné & tourturé, criant espouventablement. Ses douleurs cessees, il se met à contrefaire plusieurs sortes d'animaux: il represente premierement (car il commençoit tousiours ainsi) le poullet, la poule, le coq, la grue, la per-

drix, le chathuant, la chouette, le pigeon, & autres oyseaux, le chien, le cheual, le cheureau, la brebis, &c. aussi naïfvement que les animaux mesmes, faisant par fois des poses pour donner des coups de poings contre son lit, on conta lors iusques à cinquante trois sortes d'animaux qu'il contrefit, sans faire vn mesme cry deux fois, & ne les reïtera point qu'en diuerfes inuasions. Il demeura en cette action plus d'vne heure & demye, ayant la teste en bas, & le corps ployé en rond, reuenu à soy raconta que ses forciers luy presentoint en des cages quantité d'oyseaux & d'animaux, le contrainant avec menaces de les contrefaire, & si chaque animal ne faisoit son cry qu'vne fois, que si il ne l'imitoit bien, il estoit batu & torturé, adioustant qu'entre ces animaux, il y en auoit de fort affreux qui luy faisoient peur, dont il recognoissoit les vns & non les autres.

Maistre Zacharie viollette, Notaire Royal à Niort, trouué en la maison dudit Creusé pere de l'enfant, pendant ces accez ne pouuant se persuader que cét enfant pust naturellement contrefaire tous ses animaux, aydé dudit Creusé tournèrent par force l'enfant qui estoit tourné la teste en bas, & de fait aussi tost qu'il eust la face en haut il cessa de contrefaire ces animaux, mais nonobstant tout l'effort qu'on luy peut apporter, il retourna en la mesme posture & continua.

En cét accez il y eut cecy d'extraordinaire, l'enfant s'estant promené quelque temps par la chambre s'arresta pres de la cheminee & les bras pendans, & roides demeura immobile environ vne heure: enfin commençant à se mouoir, il esleue sa main gauche la tenant ouuerte & estenduë, & la regardant avec attention, relevant puis apres les

doigts du doigt index: forma par deux fois sur le doigt index de la gauche cinq lettres, aſçauoir M. O. R. I. N. Lesquelles jointes enſemble font le nom d'un nommé Morin, la femme duquel eſtoit ſoupçonnée d'auoir donné le mal à cet enfant, lequel reuenu de ſon accez declara qu'eſtant tourmenté par ces ſorciers, il auoit reconnu à cette fois cet homme, qui lardant vn lapin l'eſtoit venu deliurer, le nommant par ſon nom de Morin, qui eſt le meſme duquel il auoit eſcrit le nom par ſes doigts, ſon accez le reprenant, & couché par terre il eſtand vne des baſtes d'une ongreline qu'il auoit, & forma par trois fois ſur icelle du meſme doigt les cinq lettres ſuſdites deux fois en petit caractère, & la troiſieſme en lettre capitale: ne ſ'oublant iamais de mettre le point ſur la lettre I. Quoy fait-il, il ſe laiſſa tomber comme s'il euſt eſté mort, fut remis ſur

son liect, & en fin reuenu à soy raconta
comme auparauant tout ce qu'il auoit
veu.

Du dix-septiesme Feburier.

CE iour ne trauaila pas moins ce
pauvre enfant que les precedens, il
retombe en son mal, souffre pareille pei-
ne, a mesmes visions, & fait de sembla-
bles actions, auxquelles il adiousta celles
cy. Apres auoir cheminé quelque temps
comme à pas mesurez, il s'arreste tout
court, & prestant l'oreille, baissa la teste
comme disant, ie le veux, il baise la main,
prend quelque chose, recourbe le bras
gauche vers l'espaullé, & remuant l'autre
fit cognoistre qu'il s'imaginoit iouer
d'un violon, tantost il retournoit les
cheuilles pour le mettre d'acord, & tan-
tost penchant l'oreille touchoit les cor-
des pour en iouer : puis comme si de

force on luy eust voulu offer ce violon, il se recule iettant ce qu'il pensoit auoir entre les mains, s'en fuit en se mocquant, & fut tourmenté à l'ordinaire par torsemens de bras: ayant quelque relasche il se leue comme pour recepuoir vne basse de viole qui luy estoit presentee, baise la main, la prend, se disposant d'en iouer; & y apportant toutes les contenances du corps & de la teste la met d'accord tournant les cheuilles, & comme s'il eust grandement peine pour en tourner vne, il met les deux mains, prend l'archet qu'il auoit posé aupres de luy, & commençant à se remuer, tournant la teste rend l'instrument avec remerciement comme si quelqu'un le luy eust demandé: & rebaisant la main comme s'il eust repris quelque autre chose (à ses gestes on reconnut que c'estoit vne cornemuse) & la tenant entre ses bras, & mettant le bourdon sur ses espaulles: il souffloit, enflant

ses ioues, & remuant ses doigts, y obser-
 uant ce que feroit le meilleur maistre,
 enfin iettant l'instrument il s'enfuit, &
 fut battu à l'ordinaire : se promenant &
 tout en cholere & avec menaces de se
 vanger : il sembla par apres prendre vn
 haut-bois avec toutes les actions conue-
 nables, le iette, s'en fuit, & est traité
 comme auparauant. Voicy en suite
 vne autre commission qui luy est don-
 nee, il prend quelque chose qu'il iette
 sur son espaule par dessus la teste, y passant
 le bras gauche, comme si c'eust esté vne
 escharpe ou vn baudrier : puis accom-
 modant quelque chose à son costé il ad-
 uance les deux mains, & lors on iugea
 qu'il iouoit du tambour sonnant la gar-
 de, la diane, l'alarme, la retraicte, ob-
 seruant toutes les desmarches : enfin il
 quitta tout, s'enfuit & est battu & tour-
 menté. Reuenue à soy, il raconte tout ce
 qu'il auoit veu, se plaignant tousiours
 de ces

de ces deux femmes ayant des couure-
 chefs blancs qui le batoient. Comman-
 çant à prendre son repas, le voila dans
 son mal & dans ses tourmens, il s'assit
 sur le carreau, ce qu'il n'auoit point enco-
 re fait, & se mit à exercer vn nouueau
 mestier (on recognut incontinent qu'il
 passoit de la farine) puis comme laissant
 le sas, & ayant assemblé la farine en vn
 monceau, il ferroit ses mains & ses ha-
 bits, & prestant l'oreille du costé gau-
 che, faisant signe de la teste, Il aduançe
 sa main pour prendre quelque chose, on
 iugea à son action que c'estoit vne poul-
 laille luy coupant la gorge, l'eschaudent,
 la plumant, puis se leuant il sembla l'atta-
 cher à vn cloud, & nobmettant rien de
 ce qui est requis en vn patissier bien ex-
 pert en son art, il laue, il chauffe son eau,
 taste du bout du doigt si elle est assez
 chaude, souffle son feu, prend la farine,
 la pestrist comme vn pasté, coupe du

lard, reprend la poullaille, la coupe en morceaux, l'arrange dans le pasté: noubliant à mettre par dessus l'espace & le fel, & fit ainsi consecutiuelement trois pastez: il cōtinua ce mestier long-temps, faisant toutes sortes de pieces de four comme s'il eust eu quelque grand festin à faire, & se hastant autant qu'il pouuoit: le festin finy voicy les sept baladines qui entrent, il les fait danser comme il auoit desia fait, dansa mesme certaines danses desquelles on n'auoit iamais ouy parler, quoy fait il se promene par la chambre s'assise pres du feu sur vne chaire qu'il y rencontre, & comme s'il eust tiré le lait d'une cheure, le donne en sept escuelles à sept personnes, puis alongeant le bras, tenant la main fermee, comme s'il eust tenu vn verre, le ramene à la bouche pour boire, il estend derechef le bras comme voulant encore boire, le pere s'aduise de faire promptement

apporter de l'eau, & voulant boire en imagination le fit boire en effet, & par deux fois il tombe comme mort; & re-
 uenu à foy conte tout ce qu'il auoit fait
 & souffert selon l'ordre qu'il a esté repre-
 senté cy-dessus, & particulièrement
 auoir esté de la dance, mais non du festin,
 qu'il auoit demandé à boire, & qu'à pei-
 ne on luy en auoit donné dans vn mes-
 chant gobelet que la premiere fois, l'eau
 estoit molle, & guere bonne, mais que
 les autres fois il auoit beu de bonne eau
 & fraische.

Du 18. & 19. Februrier.

L'Enfant dans l'accez de ce iour
 commença à descouurir le nom
 de celle qu'il auoit si souuent fait danser,
 priué de ses sens, comme son mal luy en
 ostoit tousiours la fonction: il s'appro-
 che du foyer, & couché par terre, net-
 toyant la place de la main, escriuoit sur le

carreau, la mere s'aduifa de semer des cendres deuant luy, sur lesquelles en presence de plusieurs persone, & particulierement de Pierre ferré Maistre Chirurgien, il escriuit ces mots en lettre capitalles, **VIEILLE, IE TE RECOGNOIS DE VISAGE ET NON PAS DE NOM,** & tout aussitost apres escriuit au deffoubs, ayant quelque temps resué; le mot en lettre capitale **IE ANNE.**

Reuenu à foy, comme il voulut commander à dire ce qu'il auoit veu, le mal le reprend, se met comme deuant en posture pour escrire: le susdit Pierre Ferré trouua le moyen d'auoir d'autres escrits du patiant qui peussent estre veus de tout le monde, met vne plume trempee d'ancre en la main de l'enfant, & luy coule par deffoubs vne feuille de papier: l'enfant comme tout estonné, apres auoir long-temps tourné cette plume, escriuit

ce mot, *Medecin*, auquel il adiousta
Je ne dis rien autre chose, il escriuit encore
ce nom, *Ieanne P* : Mais pour quel-
que particuliere consideration on se
retient d'esclaicir qui estoit celuy ou cel-
le dont l'enfant parloit, cét enfant com-
me ayant bien retenu le commande-
ment que luy auoit fait son pere de re-
cognoistre celles qui le faisoient ainsi
danser, escrit sur diuerses feuilles de pa-
pier, & à diuerses reprises ce qui s'ensuit,

La petite Morine corps bleu & bonnet.

De fait comme on alla voir cette fil-
le on trouua qu'elle auoit vn corps bleu
& vn bonnet, tout ainsi qu'il l'auoit re-
presenté.

La grande fille à Morin le patissier.

Celle cy, au dire de l'enfant, estoit
vne de celles qui le tourmentoient, &
estoit ces deux filles & la femme du
patissier que l'enfant auoit accusé *la fem-
me à Morin*, Voicy la mere de ces deux

filles par laquelle l'enfant dit auoir esté enforcé du coup qu'elle luy donna par la teste en la boutique, estant la seconde qui le tourmentoit aussi cruellement dans ces accez: *Une vieille femme qui demande l'aumosne Millatte*, puis reue-nu à foy, il s'expliqua & dit que c'estoit vne vieille femme qui demouroit chez Millatte. P. la fille. Apres auoir ainsi déclaré par escrit ces noms, il fut cruellement tourmenté; Mais ayant du relasche il commença derechef à escrire, *ô grand Dieu admirable, mon Iuge, & mon Sauueur, monstrez vous pitoyable à moy pauvre pecheur. Morine tu mas battu, mais ie me console en Dieu, & ne prend point d'esgard à Sathan: ha! meschante Morine, tu m'amene tous ces animaux pour les contrefaire. Meschante Morine ie ne m'amuse point à tes danses; car c'est Sathan qui me veut tenter: mais Dieu par sa toute puissance me gardera, s'il luy*

plaist. Ha! meschante Morine, tu me-
monstre crapaux & serpens à fin que ie
les prenne: mais Dieu ne veut pas. Elle
les met allentour de moy: mais mon Dieu,
garde moy: oste moy cela d'allentour de
moy: fais moy misericorde bon Dieu. Ce
que dessus escrit le dix-neufiesme Feb-
urier.

Reprenant ses escrits & retombé dans
vne autre accez il escriuit, Va meschan-
te, Dieu m'asseure que tu sera bruslee, car tu
me fais bien endurer du mal que ie ne
puis supporter. Meschante Morine tu me
tues. hélas! Seigneur, aye pitié de moy.
Je te prie Morine, au nom de Dieu, oste
moy cela, tu n'auras point de mal? tu dis
que tu ne me l'osteras point, mais tu seras
bruslee: car Dieu est tesmoing, qui est la
sus au Ciel. Ce que l'enfant escriuoit c'e-
stoit pendant son accez, estant roide
comme vn mort, estendu en terre, &
n'ayant point de mouuement qu'à la

la main droicte dont il escriuit.

Le bruit d'une si prodigieuse maladie s'estendant par tout: comme de tout costez on venoit voir cet enfant, les Officiers du Roy de la ville de Niort vinrent visiter le malade, lequel ils trouverent dans vn intervalle d'un sans rassis, discourant en bons termes de son mal: Mais en leur presence le voila dans vn violent paroxisme: dans lequel il fait des actions si estranges que ces Messieurs ne les pouuant croire naturelles manderent d'Office Commineau Chirurgien à Niort, & des Medecins autres que ceux qui l'auoient desia visité, ce Chirurgien fit ce qu'il pust pour descourir si ce malade pendant son mal auoit du sentiment, il le pince en diuers lieux de son corps, luy presse les parties honteuses, luy donne vn coup du bout du doigr dans le costé dont il ne s'esmouuoit non plus que si l'on eut touché quelque pierre: mais reuenu à soy
il sen-

il sentit, & se plaignit de la douleur es lieux où il auoit esté touché.

En presence desdits Officiers il escriuit dans l'accez, *Voyla, Dieu est tesmoing, & puis cecy, Ha! sorciere tu me monstres vn chappellet d'herbes, gueris moy donc au Nom de Dieu, où tu seras bruslee.*

Cette circonstance est vne des plus remarquables qui soit dans toute ceste Histoire, & pour laquelle entendre, il est besoing de sçauoir qu'un intime amy du pere de l'enfant, desirant en quelque façon que ce fut la deliurance de ce malade, suiuant le conseil qui luy fut donné, met la nuict sous la porte du logis du paticier, duquella femme & les filles estoient accusees, vn chappellet d'herbes. Il n'auoit communiqué cela à personne, & toutes-fois approchant de la porte, & mettant ce chappellet d'herbes, il ouye vne voix qui dit, *le voicy*, & arriua qu'au mesme temps, l'enfant dans son

accez, parla de ce chappellet d'herbes, comme si l'une de ses forcieres le luy eust présenté, & continua d'escrire cecy, *Ha meschante Morine, tu me veux faire mordre à ces vermines & crapaux, mais Dieu me garde. Bourrelle oste moy cela. Seigneur ramolly le cœur à cette meschante femme, quelle vienne m'oster ce mal quelle m'a donné, à fin de te servir & honorer mieux que ie n'ay fait, ainsi soit il.*

Ha, meschante Morine, tu me veux estrangler, mais tu n'en as pas la puissance: car le bon Dieu me gardera, s'il luy plaist, au Nom de son Fils bien-aimé IESVS-CHRIST. Grand Dieu, puis que cette meschante femme ne veut pas m'oster ce mal, ie te prie, bon Dieu, oste le moy: à celle fin qu'un iour ie te puisse obeyr en tes saints commandemens, ainsi soit-il.

Tien, meschante, voila Dieu qui enuoye un de ses Anges pour servir de tes-

moing : car le Seigneur a enuoyé l'Ange pour me secourir. Secours moy, pauvre miserable : diableſſe enragée, tu ne m'oſteras pas cela : va, que le diable te rompe le col. Encore quil n'y ait perſonne en ce lieu qui m'entende, Dieu eſt teſmoing, qui voudra que tu ſois bruſlée : vien, voy l'Ange qui eſt avec moy qui me conſole : il m'aſſeure que Dieu me l'oſtera. Ha, meſchante Morine, tu me veux eſtrangler, mais Dieu ne t'en donnera pas la force,

Ha! meſchante, regarde là ſus au Ciel, car le bon Dieu y eſt : regarde le, pendarde : dis que non ſeras, que tu ne le regarderas pas. Il t'eſt aduiſ qu'il ne nous void point : mais il ne laiſſe pas de nous voir en cette noirté.

Ainſi paſſa le iour & la nuit du dix-neufieſme Feburier. Le Dimanche ſuiuant vingt-ieſme du mois, le peuple venant à foule voir cet enfant. Après auoir

souffert des tourmens horribles, se remet à escrire,

Va Sathan tu n'as point de puissance sur moy: car le Seigneur Dieu est dans mon cœur, Dieu ne permet pas que Sathan ait du pouuoir sur moy. Arriere de moy Sathan: car tu me veux tenter: mais Dieu par sa toute puissance me garde. Escriuant cecy il auoit le bras gauche roide, la main ouuerte vers le Ciel: quelques fois il se remuoit comme chassant quelqu'un, & le frapant à coups de poings, dont il estoit cruellement tourmenté, criant si horriblement que le peuple present pleuroit de pitié. Ayant du relasche il escriuit: *Seigneur ie suis ta creature, tu m'as fait & formé pour te seruir & honorer.*

Mon Dieu, fais moy comme tu as fait à Suzanne: enuoye moy Un tesmoing du Ciel. Arriere de moy Sathan: tu n'as point de pouuoir sur moy: i'appartiens à

Dieu qui me garentira.

Mon Dieu, ie voy allentour de moy toutes sortes d'animaux qui me veulent outrager : mais, bon Dieu, ne leur donne force ne vertu, à celle fin qu'ils n'ayent aucune puissance sur moy.

Mon Dieu ne m'a bon donnees jamais : car ie suis de tes enfans ; & le Diable n'a point de puissance sur les enfans de Dieu.

Bon Dieu, permets que cette Morine me vienne oster ce mal. Tu dis que tu nen feras rien. Ha ! que Dieu sçait bien chastier les meschans. Et n'as tu poinct de honte, de dire que tu ne crains point Dieu. S'il nous abandonnoit nous serions trestous perdus.

Vileine tu appartiens au diable qui est ton maistre, mais moy i'appartiens à Dieu mon Sauueur, c'est mon maistre celuy-là.

Mon Dieu, ne me delaisse point, si te plaist : & puis que cette meschante Mo-

rine ne me : Le papier luy ayant esté tiré par vn de la compagnie qui en en fut blâmé, il recommence d'escrire, *Seigneur si tu veux m'auoir avec toy, ie mets tout entre tes mains.*

Ha Sathan, tu me monstre chasteaux, & argent, & or, à celle fin que ie me donne à toi, ô que tu auras beau me monstrier or, argent, & chasteaux : iamais tu n'auras puissance sur vn seul cheueu de ma tefte : car le bon Dieu me tend les bras pour aller au Roiaume des Cieux.

Allez sorciers à tous les diables, vos maistres: Et moy ie vay deuant mon Dieu.

Va Sathan tu auras beau me monstrier ceci ou cela, & que ie serai prou riche, quand i'auray la crainte de Dieu : va donc arriere de moy Sathan.

L'enfant escriuit tout ce que dessus, estant souuentes fois interrompu par de grands tourmens.

Du 21. Feburier.

LE Lundy vingt-vniesme Feburier,
les accez ordinaires luy reprenant,
il continue d'escrire dans son mal, *Va*
Sathan, tu auras beau me monstres ces
thresors: iamais ie ne me donneray à toy:
car le Seigneur ne le veut pas: il me gar-
de, fais Seigneur qu'il n'ait point de puis-
sance sur moy.

Mon Dieu, s'il te plaist, que cette mes-
chante me vienne oster ce mal, s'il te
plaist, bon Dieu: ou bien si tu ne veux
qu'elle me l'oste, ie te prie, Seigneur, oste
le moy par ta sainte grace.

Va Sathan, & fortiere: car voila l'Es-
prit de Dieu qui parle en moy, & qui ser-
uira de tesmoing: ô que le bon Dieu n'aban-
ne point ses enfans, ceux qui ont recours à
luy.

Puis ayant ellancé ses mains au Ciel
escriuit, ô Seigneur Dieu, que tu me gardes

bien, car Sathan n'a aucun pouuoir sur moi. Helas ! mon Dieu, tu as pitié de ta petite creature : arriere de moi Sathan. Icy reuenü à foy l'enfant se met à prier Dieu : mais il retomba incontinent en son mal : & escriuit, Ha Sathan, tu dis qu'il ne faut pas croire en Dieu : si fait, il y faut croire : en despit de Sathan ie croirai en Dieu.

Fui Sathan : Voila l'Esprit de Dieu qui parle en moi. Icy il ietta la plume, & leuant la teste se mit à parler, ce qu'il n'auoit encore fait dans son mal : & dist, priué de tous les sens, Sus, sus, enfans de Dieu leuez vous, & chantez ses louanges. Laisant retomber sa teste, peu de temps apres il la releua, & prononça ces mots, Craignez Dieu, aimez Dieu, & il sera avec vous. L'enfant reuenü à foy, & enquis d'oü il venoit, respondit comme il auoit tousiours fait, & qu'à cette fois Sathan s'en estoit fuy, & que l'Esprit de Dieu

Dieu auoit parlé par sa bouche. A peine il acheuoit ces paroles que le mal l'ayant repris, & la plume luy ayant esté donnée, il escriuit, *Helas ! i'estois en repos. Helas ! Dieu me consolait. Je suis tout seul en ce lieu, Dieu mercy : le bon Dieu m'assure qu'il ne reuiendra plus rien.* Il dist ces dernières parolles ouurant affreusement les yeux, mais sans rien voir.

Sur le soir de ce iour le Lieutenant General de Niort, qui auoit desia vü le malade plusieurs fois, le voulut encore visiter, & l'ayant trouué reuenu à foy, à sa requeste & priere, contraignit de venir en ladite maison la femme de Morin paticier, & ses deux filles : l'une aagée de vingt-quatre ans, & l'autre de six. Le malade les reconnut, & quoy qu'on eust feint d'auoir fait venir vne autre femme, il soustint que c'estoit celle qu'il auoit accusée : & asseuroit qu'elle l'auoit enforcé, estant allé chez elle faire re-

chauffer vn pasté: & qu'elle l'auoit frappé sur la teste: & la prioit instamment de luy oster ce mal: Mais elle fut aussi resoluë à le nier, que le malade à l'asseurer: en fin, cette femme se voulant retirer, l'enfant la prit par sa robe, criant, las! donnez moy du bois que ie la brusle, car c'est vne forcierre. Cette femme se retira, & la nuit suiuant l'enfant eust du repos, & commença tant soit peu à se remettre.

Du troisieme Mars.

CE pauvre patient eut du relasche iusques au troisieme Mars, qui estoit vn Vendredy: sur le midy de ce iour, il commença à sentir les accez d'une fascheuse recheute: & apres de grandes douleurs de teste, tombe à son ordinaire comme mort: on le met sur le lict, d'où se leuant en sursaut se promene quelque temps par la place: mais aussi

tost, comme s'il eut apperceu reuenir les
 femmes, il cherche quelques armes pour
 s'en deffendre; Mais n'en ayant trouué,
 fuit, se iette par terre, prie Dieu, & chan-
 geant de contenance, se releue comme
 tout assure, & faisant signe de vouloir
 escrire, on luy donne vne plume & du
 papier, & escrit, *Vous ne me voulez pas
 faire Iustice, mais Dieu me la fera.* Ayant
 derechef prié, il escriuit encores. *l'Ange
 de Dieu me dit que le bon Dieu frapera le
 cœur de Monsieur le Lieutenant, & Pro-
 cureur du Roy, à faire Iustice.* Icy
 l'on iugea qu'il voyoit quelque
 chose d'extra-ordinaire, & se tournoit
 tousiours du costé droit pour escouter ce
 que l'on luy disoit, & prestant l'oreille de
 ce costé escriuit, *Elle me veut faire faire
 des pastez: les feray-ie, bon Dieu.* Et apres
 auoir vn peu escoutté, adiousta, *Non. Et
 bien, bon Dieu, ie te croiray en tout ce que
 tu me commanderas.*

Ayant encore quelque aduis du costé droit, mit ses mots, *Va, tu es de mes enfans: vien avec moy, & iamaïs tu ne retourneras en ce lieu, où cette meschante t'a-
meine, & aye tousiours la crainte de Dieu.*

Il reprend ses esprits: le mal l'ayant quitté raconta des choses admirables de l'assistance d'un Ange de Dieu, qu'il dit luy estre apparu, disant, que sa face estoit admirable, & desirable, d'une blancheur extrême, & que s'estant voulu prosterner deuant luy, il l'auoit fait releuer, luy commandant d'adorer vn seul Dieu, l'exhortant à le prier sans cesse. Mais il eut peu de relasche, car retombé dans l'accez, il fit des sauts extra-ordinaires, & les actions d'un homme qui se defend courageusement de ses ennemis, ferme les poings, menace du doigt, & se moquant des sept personnes qu'il marquoit par le doigt, faisant des gestes de mespris, se prosternant en terre, & ayant

prié, escriuit, apres auoir escouté du costé droit, *He bon Dieu, n'es tu pas Tout puissant pour faire justice, ie m'asseure qu'ouy,* & adiousta, *touche moy à la teste pendarde, ie seray guarý, & la plume en la main,* comme s'il eut entendu la responce du costé droit, peu de temps apres il escriuit, *tu ne veux pas m'y toucher, Hé bon Dieu, donne moy des aisles que ie volle avec l'Ange qui s'enuolle.* Et la dessus faisant des efforts merueilleux, attrapa l'un de la compagnie, qu'à peine on pût oster de ses mains, & vouloit monter par dessus luy, taschant à s'essancer sur le ciel du liect qui estoit dans la chambre, touchoit de la main ses espaulles, s'imaginant auoir des aisles, retombe à terre, il escriuit, *chasse tout cela bon Dieu, & ne m'abandonne poinct Seigneur.* Ayant ietté sa plume à l'ordinaire, il se releue, & sans se faire mal retombe de son haut, on le met sur son liect, où il reposa pres de demie heure, &

dans'cét accez il parla, & croioit on du commencement qu'il estoit hors du mal. Mais la suite de ses actions fit recognoistre qu'il estoit dans l'accez, il se leue sur son liect, & à genoux les mains jointes au Ciel, profera ces mots, *Mon Dieu ayde moy, mon Dieu assiste moy, mon Dieu secours moy, & me garde de ces meschantes gens, mon Dieu, enuoye moy l'Ange, qu'il me garde s'il te plaist.* Et apres auoir presté l'oreille du costé droit, comme estant assure par l'Ange, *Non, non, dit-il, ie n'auray poinct peur, ie m'en vais voir ces meschantes gens, & sorciers, & se retournant comme parlant à cet Ange, adiousta, gardez moy donc bien, & s'estant tourné du costé gauche, adiousta, mon Dieu, ie ne voudrois poinct voir cela, ce qu'il dist, se refroignant, mais ayant derechef consulté ce costé droit, il se montra fort resolu, & dist, *Non, non, dit-il, ie n'auray poinct de peur. Je ver-**

ray tout, mais garde moy donc bien, ad-
 ioustant ces dernieres paroles, comme
 s'il y eust eu quelqu'un auquel il eust par-
 lé, & baissant sa teste sur les genoux, cria,
Hola, dictes meschantes sorcieres, & sor-
ciers, enchanteurs, & enchanteresses, &
deuineresses, parlez à moy, & dites moi,
meschans si pouuez deuiner qui est avec
moi, puis comme oyant quelque res-
ponce, Vous dites que vous ne sçau-
riez, dit-il, il est bien vrai, vous ne sçau-
uez pas ces choses, Dieu qui me garde :
mais vous sçauiez bien les choses du Dia-
ble vostre maistre. Et comme si on l'eut
menacé, il dit d'une parole ferme, Non,
non, ie ne vous crains poinct, ie suis bien
asseuré Dieu merci. Tu dis que tu me veux
mener au Sabat, ie n'en ai point affaire,
va au diable toi & ton Sabat : tu n'as
point de puissance sur moi, tu me presente
un caractere, non ie n'ai point affaire de
ton caractere, ie ne veux point des choses

du diable, arriere de moi Sathan, & se retournant du costé droit, & bien, bien, ie verrai tout, prenez garde à moi.

Tenant la teste appuyé sur ses genoux, il eust des visions horribles, & sans auoir la fonction d'aucuns des sens de la nature, profera ces paroles dans son accez: *Helas ! dit-il, meschantes gens, sorciers, & sorcieres du diable, ho que vous estes vilains de seruir vn si meschant maistre, qui vous fait tant de mal, ayant quelque peu escouté ; comme si on luy eust respondu, repliqua, le mien, mon maistre c'est le bon Dieu, qui est mon maistre, il ne me fait point de mal, car ie le prie tousiours, mais le vostre c'est vn meschant vilain cornu qui vous bat comme des chiens, & ayant encore escouté quelque responce, tu dis que tu en es bien fasché, & pourquoi te donnois tu à lui ? que ne priois tu Dieu comme moi : tu t'en repens, il n'en est plus temps : tu as*
faict

faiët la faute tu la boiras. Et reuenü de son accez il raconta auoir veu celle qu'il auoit accusée de luy auoir donné le mal avec sa grande & sa petite fille: & retombant tout d'un coup dans son mal, comme adressant la parolle à la mere *Non, non, ie ne te crains poinët, tu n'en as pas la puissance: Dieu me garde: va le querir ton Diable cornu, ie ne te crains poinët: ie ne bougeray pas pour luy ne pour toy.* Puis comme si le Diable se fust monstré & approché de luy, ô meschant vilain arriere de moy, ô que tu es laid; ie ne te crains poinët; car ie suis bien gardé. Et tendant vn de ses doigts. Tien, dit-il, *voyla mon doigt, tu n'oserois seulement y toucher. Ie sçay bien pourquoy, tu n'oserois, car Dieu m'a donné des Anges pour me garder.* Et comme si le Diable se fust aussi vanté d'auoir des Anges, il luy dit, *Tu dis que tu as des Anges, monstre les moy donc, s'ils sont pareils à ceux qui*

m'assistent : non, non, tu n'en as pas de semblables. Et comme si le diable luy en eust monstré quelques vns, il s'escria par rilee, Bay le vilain, qu'il est laid avec ses Anges, ils ont des aisles de chauuesouris, & des cornes, le nez crochu, & des pieds de bœuf. Puis comme si le diable l'eust menacé de luy faire porter la penitence de toutes les paroles qu'il luy disoit, il luy respondit avec vne parole ferme & asseuree, Je ne te crains poinct, tu n'oserois, Dieu ne t'a il pas enchainé pour mille ans: ie ne crains, ny tes diables, ne toutes tes vermines qui n'ont poinct de puissance sur moy. Tien, vilain, voila mon doigt en leur gueule, ils n'oseroient me mordre: Je les prendray, les abbateray en terre, & reposeray ma teste sur eux: Sur cela il se coucha par terre, il tourna plusieurs fois son corps comme s'il eust esté sur les demons, & releué, il sembla les prendre, & les ietter les vns apres les autres: &

changeant tout d'un coup de discours,
dit, *Tu me veux mener aux nopces, ie ne
veux point aller aux nopces du diable,
mais à celle de l'Agneau du Fils de Dieu
I E S V S-CH R I S T. Tu dis que tu
me donneras vne liuree, ie n'ay que faire
de ta marque: le sang du Sauueur est ma
liuree: voire mesme celle que i'ay à mon
chapeau neuf est plus belle que la tienne.*
*(C'estoit vne aulne de ruben bleud que
son pere luy auoit donné trois iours au-
parauant) & comme si le diable luy eust
présenté des miroirs, mon miroir, dit-il,
c'est la Croix de I E S V S: mais encore
y en a t'il de plus beaux que les tiens en la
boutique de mon pere, & dans lesquels ie
me regarde quand il me plaist. Vne autre
vision se presente à luy, il semble voir
vne grande chaudiere sur le feu environ-
née de flammes, dont tout effrayé il s'es-
cria par trois fois, Ha! la grande poille:
Et cela d'une action pleine d'horreur:*

Et haussant la teste, les mains jointes & leuees vers le Ciel il s'escria, *I E S V S, mon Dieu, qu'elle est grande.* Puis prestant l'oreille du costé droit son bonnet en la main dit, *Bien ie verray tout, puis qu'il plaist à Dieu: mais garde moy donc bien.* Ayant remis son bonnet, l'enfant derechef tomba sa teste entre ses genoux, & admirant cette grande chaudiere tout effrayé ietta ces exclamations: *Ha! la meschante Morine, elle met vn petit enfant dans la poile pour le faire brusler. O la meschante elle luy a mis.* Et comme si cét enfant l'eust appelé par son nom, il luy dit, *Qui es tu petit enfant qui me cognois, de m'appeller petit Creuse: ie ne te cognois poinct.* La suite de ses actions donna à cognoistre que cét enfant qu'il s'imaginoit voir dans cette chaudiere estendant sa main le supplioit de l'en retirer, ce qu'il ne voulut faire, mais l'exhorta à prier Dieu, & luy demanda

son nom, mais l'enfant deserrant les le-
 ures pour le dire, il s'imagina voir cette
 Morine luy fermant la bouche de ses
 deux mains. Cette illusion finie en voicy
 vne autre: il luy semble que ces balladi-
 nes ordinaires estoient encore reuenues:
 il reproche à l'une qu'elle la traité trop
 cruellement: à l'autre qu'en passant elle
 luy auoit deschiré son collet. Et sembla
 se resiouir, comme s'il eust veu le diable
 tourmenter cette femme qui l'auoit en-
 forcélé. En fuitte dequoy, il s'imagina
 voir vn nombre infiny d'hommes, de
 femmes, & d'enfans, & de toutes sortes
 de qualitez, dont les vns estoient dans
 des chaires bruslantes au milieu des flam-
 mes, portees par des animaux de feu. En
 vne de ses chaires il vit vn homme de sa
 cognoissance, qu'il nomma hautement
 par son nom, (c'estoit vn homme du
 pays decedé il y auoit enuiron fix mois:)
 luy estant aduis de voir au milieu des en-

fers les damnez souffrir dans les flammes
 eternelles, que le soufle de la cholere de
 Dieu embraze continuellement.

Il vit en suite vn grand peuple, mais
 de gens tous masquez : dont estonné, &
 ioignant les mains, il dit, *Mon Dieu, que*
de meschantes gens: ie croy que tout le mon-
de de Niort est sorcier, au moins la plus
grande part. Ils ne sont pas tous d'icy,
Dieu mercy. Et ostant son bonnet, &
 escoutant du costé droit, comme ayant
 receu de nouuelles assurances, *Bien,*
bien, ie verray tout; mais garde moy donc
bien: Lors baissant la teste entre les ge-
 noux, à son ordinaire, apres auoir esté
 long-temps en cette posture, il commen-
 ça à parler: exhortant les forciers à prier
 Dieu comme luy: & sur leur refus, &
 menaces, il leur dit, *Vous ne sçauriez*
m'empescher de prier Dieu: ie le prieray en
despit de vous. Et sur cela repetta tout
 au long la priere Dominicale, & ayant

commencé le Symbole des Apostres, s'interrompit soy mesme par deux fois, disant, *Entendez donc meschans* : Et ayant acheué s'escria, *Et bien malheureux vous n'avez sceu m'empescher de prier Dieu, car il est plus fort que vous tous*. D'autres visions suiuirent les precedentes, il vid passer quantité de peuple à la file, comme il le raconta estant hors de son accez : puis vid passer deux grandes compagnies de gens d'armes masquez, dont l'une alloit au lieu d'où l'autre retournoit, les deux chefs qui les conduisoient estoient deux diables qui portoient des cornes, d'une espouuentable hauteur, & lesquels se rencontrans s'entresaluerent, se baiserent & s'embrasserent. Apres ceux cy, il s'imagina voir des troupes de gens à bonnets carrez, avec des plumes de chapons sur chacune corniere de leur bonnet, apres lesquels, & quantité d'animaux affreux ayant passé,

on portoit des tables & des verres de toutes sortes comme pour faire vn grand festin : en cette troupe il reconnut le patif-
 fier accusé de sortillege, & lequel en passant menaça cét enfant, luy faisant reproche qu'il estoit cause que sa fille n'estoit pas mariee, mais l'enfant n'en fit grand compte. Peu de temps apres il vid retourner tout ce peuple à la foule, dont en sursaut il se relleue & s'escria, *Mon Dieu, que de peuple : mon Dieu, que de gens : mon Dieu, que de Sorciers : Iesus ayez, ayez, pitié de moy.* En fin il reuint tout à faict de son accez : & raconta toutes ces merueilles.

A peine eut il satisfait à la nature, que retombé dans son mal, & semblant voir cette Morine, il s'escria, *Morine, oste moy ce que tu m'as donné. Hé ! oste le moy à cét heure, & pourquoy faut-il que tu le demande à ton Maistre ? & à qui ? & à ton Maistre cornu. Tu dis que tu me l'osteras*

*l'osteras à cette heure : & pourquoy ? tu
dis que tu n'as pas ton corps, & quel corps
veux tu dire. Tu dis, ton corps de chair,
& comment es tu donc icy ? c'est ton esprit :
mon Dieu, va donc querir ton corps, & ie
t'attenderay, afin que tu m'oste ce mal,*
Il profera ces paroles par inter-
ualles, comme escoutant la responce:
& repliquant apres l'auoir entenduë,
luy promettant vingt-escus si elle luy
vouloit oster son mal: & comme elle luy
eust demandé, *Mais si ie l'oste à
qui le donneray-ie*, il dit, *ie ne veux pas
que tu le donne n'y à vne brebis, ou à un
coq : car ils sont à Dieu : mais prens le pour
toy, ou le donne à ton Maistre. Là se teut
l'enfant : estant reuenu à soy il raconta
toutes les choses qu'il auoit veues, sans
rien obmettre : protestant tousiours &
iurant, qu'il n'auoit iamais parlé ny es-
crit, quoy qu'on luy eust entendu, &
veu proferer ce qui est dit cy-dessus, &*

qu'on luy presentast ce qu'il auoit escript de sa propre main. Et d'autant que le long trauail qu'il auoit eu luy faisoit desirer le repos, & qu'il estoit nuict, il pria les assistans qu'on le laissast dormir, & quelques vns se disposerent à le veiller. Il prend quelque nourriture, & apres auoir reposé pres de deux heuress'eslança en la place, & s'escria, *Sauuez moy: l'on me veut estrangler, on m'estouffe.* N'en pouuant presque plus il tire la langue de la bouche, il met les doigts comme pour entirer ce quil le pressoit, l'usage du parler luy estant osté, il fait signe de vouloir escrire: prenant la plume il escrit, *Je n'en puis plus, ie m'en vay,* Comme la plume luy tōbe des doigts, il se laisse aller entre les bras de son pere: reuenu à peine par les remedes qu'on luy donna, reprend encore sa plume, adiousta, *Mon Dieu, que ses poisons puent,* Succombant au mal, son corps se roidit: il tombe sur son liēt

la face en bas, il s'escrie, *Elles m'estouffent, les meschantes.* Ayant tant foy peu de relasche, il se rendort, & se resueillant quelque temps apres, repete par plusieurs fois ces mots, *Mon Dieu, la teste: & souffre son accez à l'ordinaire: pendant lequel ayant la main gauche tendue vers le Ciel, & roide, escriuit de l'autre, Ha! que l'Ange me console bien, hélas! IESVS bon Dieu.* Ayant tout d'un coup ietté la plume, & par autant de fois qu'on la luy vouloit mettre entre les mains, consultant tousiours auparauant son costé droict: finalement comme forcé la reprend, & escrit: *Voulez vous sçauoir ce que ie voulois escrire: là dessus iette la plume, regardant uers le Ciel: puis la reprenant en cholere, adioust, Et l'Ange me dit qu'il ne faut pas que i'escriue, & desobeyrois-ie à Dieu.* C'et accez le quitte, mais il ne fut pas plustost finy qu'un autre le reprend: il a les mesmes vi-

sions, voit la sorciere, & luy parlant à haute voix la prie de luy offer son mal, conteste contre elle, dispute contre le diable, & refuse les aduantages que luy promettoit le diable, luy demandant un de ses cheueux (ce qu'on iugea par la responce.) Il repliqua, *Que ie te donne un de mes cheueux, ie serois larron: car ie donnerois ce qui n'est pas à moy, puis quil est à Dieu. Tu demande donc de mes ongles, tu n'en auras poinct. Tu dis de ceux que ie rongne & que ie iette: ie ne te donnerois pas seulement du bourrier qui est dedans, non pas seulement un crachat: car si ie t'auois donné quelque chose, tu trouuerois bien le moyen de m'auoir. Va ie ne te crains poinct, Dieu me garde, ie suis plus fort à prendre que tu ne pense: ie suis à Dieu. Va vilain diable en tes enfers d'où tu es.*

Quelques personnes de qualité estans par curiosité venus visiter le malade en-

trerent sur les paroles qu'il proferoit : & desirant sur tout qu'il peust escrire : cessant de parler, prend la plume, escriuit ces mots, *C'est que l'Ange m'a fermé la bouche : ie ne puis plus parler. Et vous meschans, vous en estes cause. Et se tournant du costé droit, son bonnet en la main, il escrit, Ha ! meschans, vous estes cause que l'Ange se depart de moy. Tombé comme aux autres fois il souffre les mesmes tourmens, raconte ce qu'il a veu, n'oublie poinct les sept forcieres, & qu'un diable avec une barbe grise sonnoit du violon : il ne fut gueres en paix, son malle reprend ; & priué de tous ses sens commence à dire, *Ha ! te voila, Morine : & bien, te voila Morine : as-tu à cette heure ton corps ? Et parlant au diable, Va te cacher affronteur, tu n'es qu'un meschant, & un coquin : Tu promets prou d'argent au monde, mais tu ne donnes que des feuilles de chesne. A peine**

cet accez le quitte qu'un autre le faisoit,
 dans lequel il despeint ce diable : le de-
 clare semblable a A. P. ayant la barbe
 de Iudas, & faict comme luy : ce qu'il
 confirmoit. Puis estant hors de son ac-
 cez le patient eut du relasche un iour en-
 tier sans sentir aucune attaque : & pen-
 soit on qu'il fust entierement deliuré.
 Mais arriua en cet entre temps une cho-
 se digne de remarque : Le Ieudy neufies-
 me de Mars entre une & deux heures du
 matin il y eut un grand tremblement, &
 un tel bruit dans la maison de ce pauvre
 malade, qui estoit celle de son pere, que
 le iour venu tous les voisins croioient
 que le diable eust bouleuersé cette mai-
 son : & toutes-fois il n'arriua autre acci-
 dent : & la seruante aduoua qu'à la per-
 suasion d'une autre sienne voisine elle
 auoit mis un chappelet de certaines her-
 bes sur le cheuet du liét du malade, & un
autre à la cheminee, en ayant retenu

pour foy: ce qui fut creu auoir esté la cause du bruiet: Les forciers attirez par ces herbes (au moins si on le doit croire) auoient faiet ce tintamarre pour auoir trouué de la lumiere dans la chambre, de laquelle le diable est mortel ennemy.

Du quinzième Mars.

LE long-temps que ce pauvre enfant auoit esté sans sentir du mal: faisoit croire qu'il en estoit entierement deliuré: mais le quinzième Mars son pere prest de monter à cheual pour aller conduire Luc Creusé son frere orpheure demeurant à Chastelleraut, & une sienne sœur, qui l'estoient venu visiter en son affliction: il commence à sentir la mesme douleur de teste qui auoit tousiours accoustumé de precéder ses accez. Et pour n'user de repetition souffre les mesmes douleurs, & s'escria, *Qu'il ne demeureroit iamais dans Niort.* Et se

tournant de costé, comme parlant à l'une des forcieres qu'il s'imaginoit voir, il dit, *Hé pourquoy viens tu icy? on dit que tu n'es poinct sorciere, ie n'en croy rien, car les gens de bien ne viennent poinct en ce lieu s'ils ne sont enforcellez.* Puis prenant la plume fit voir ces mots, *Voila l'Ange de Dieu qui me dit que ie ne retourne plus en ce lieu, mais que ie m'en aille ailleurs:* Ce qu'il confirma de bouche lors que le mal l'eut quitté.

Du seiziesme Mars.

LE lendemain cét enfant souhaittant de sortir de la Ville de Niort, son pere l'emmena à quatre lieues de ladicte Ville pour changer d'air, & y demeurèrent pres de trois sepmaines, sans que pendant ledit temps cet enfant souffrist autre mal qu'une grande pesanteur de teste, dans l'unziesme iour de son relasche si biẽ que son pere le croiant entiere
ment.

ment remis , le ramena à Niort le Dimanche deuxiesme iour du mois d'Auril.

Des 3. & 4. Auril.

LE troiesme Auril cet enfant estant passé deuant la porte de ceste patissiere qu'il accusoit , & laquelle y estoit assise. Il ne fut plustost de retour au logis , que ses douleurs de teste le reprennent , & le lendemain esprouue dans vn accez tres-violent les mesmes accidens , qui l'auoient tousiours tourmenté. En la maison demeuroit vn ieune garçon nommé Nicolas Bion , cousin du malade , qui s'offroit à sondict cousin d'aller avec luy pour le suiure dans ces lieux sombres & tenebreux , & aduint que dans l'accez qui le saisit incontinent, & se souuenant de ceste promesse , s'escria à haute voix , *Mon cousin Bion , vien donc , tu me l'as promis :*

Ce cousin luy respond fort haut, Je m'en vais, mais il ne fut entendu, car l'enfant apres l'accez luy fit reproche de ce qu'il auoit manqué à sa promesse. Il escriuit dans son mal:

Tant que ie seray icy, ie seray tousiours malade: il faut quand ie seray hors du mal, que ie m'en aille: si ie n'estois point icy, ie serois gueri. Et voulant ioindre les mains pour prier, on iugeoit qu'il y auoit quelque chose entre ses deux mains qui l'empeschoit de ce faire: & de fait le mal passé, il dit que ces meschantes forcieres l'empeschoient de prier Dieu: qu'elles n'osoient s'approcher de luy lors que son bon Ange estoit avec luy; mais aussi tost qu'il s'estoit retiré, elles le tourmentoient griefuement.

Dans ces acciez il escriuit encore la mesme chose de ce que dessus:

Si tost que ie seray gueri, il faut que ie m'en aille: car si ie m'en estois allé ie serois gueri.

Du sixiesme Avril.

LE mal ayant en ce iour repris cet enfant lors de son dîner, le tourmenta extraordinairement : les bras estendus de long, & tenant ses deux jambes en arc les eslançoit impetueusement, & tantost l'une, & tantost les deux: puis paroissant tout le corps immobile, remue seulement les pieds & la teste l'un à l'opposite de l'autre: ce mouvement commençant par les pieds: & comme si quelque ressort passant au trauers de son corps eut seulement fait remuer les extremittez: il chemine des espaulles, n'ayant du mouvement qu'en ceste partie: puis se leue, se promene par la chambre, se deffend comme estant attaqué: puis prenant la plume escrit, *Mon pere ne veut pas que ie m'en aille, ce ne sera pas mon profit.*

Si mon pere ne me met hors de ceste ville,

ie croiray qu'il vouldra ma perdition. Il souffre les mesmes conuulsions que dessus, & se met derechef à escrire, Si le meschant me tourmente: le grand espoir que j'ay en Dieu me contente.

Du septiesme Avril.

LE septiesme de ce mois, apres que l'enfant eut souffert les mesmes accez, mais avec peu de changement dans ses actions, tout d'un coup se tournant à gauche, se laissa aller comme surpris de la veue de quelque chose hideuse & espouventable, mais tout d'un coup se tournant à droict, il oste son bonnet, preste l'oreille, son bon Ange estant arriué, laquelle consola: il escrit,

Je croy que mon pere est si bon homme qu'il m'ostera de ceste ville plustost que plus tard; car tant que j'y seray, j'enduray du mal.

Ces tourmens l'ayant encores repris:

il consulte derechef celuy qui l'assistoit à son costé droit, & escrit, *L'Ange de Dieu me dit qu'il faut que mon pere m'enmeine dedans trois iours sans faillir: L'Ange me dit, que si mon pere ne le fait, c'est qu'il veut que i'endure: & s'il ne m'oste d'icy, ie desireray tous les iours ma mort.*

Du neufuiesme Avril.

CE iour qui estoit le Dimanche, ce malade accompagné de son pere, s'en allant à l'Eglise prier Dieu pour sa santé, ayant rencontré la fille aisnee du susdit patissier, à ce moment sa douleur de teste le reprend, on le ramene au logis, le voila dans son mal: dans lequel s'estant tourné du costé droict, demandant aduis il escriuit,

Mon pere ne veut pas m'enmener, & ne fait donc pas ce que m'a dit le bon Dieu: s'il ne m'enuoye bien tost, il y aura du malheur.

Puis son bonnet osté, & monstrant vne face ioyeuse, se promene par la chambre, comme si quelqu'un luy eust tint la main : & lequel luy ayant dit Adieu, rencontra vne lettre sur son liét, s'en va chercher le iour pres la fenestre pour la lire, bien qu'il eust les yeux entierement clos, la iette comme en se moquant : puis ayant esté tourmenté à l'ordinaire, se mit à escrire, *C'est que si mon pere ne m'enmeine, il ne fait point le commandement de Dieu.*

Ayant apres ce long temps demeuré comme mort, il escrit encores, apres auoir presté l'oreille du costé droict, *L'Ange me dit qu'il y auoit assez de commandemens de Dieu faits, & qu'il n'en falloit plus.*

Puis s'estant assis dans vne chaise qui estoit proche du feu, sans se leuer de dessus, la porte au milieu de la chambre, & s'imaginant estre deuant quelque

grand feu , presentoit ses mains & ses pieds pour se chauffer , & sembla s'estre approché si pres qu'il s'estoit brulé : il se releue promptement , se plaint, prend son pied , & ne s'appuyant point dessus, s'approche du liect , & le mal cessé , dit qu'il s'estoit brulé se chauffant à vn grand feu que ces forciers auoient fait : qu'vn Ange l'estoit venu visiter & consoler par plusieurs fois, luy auoit recommandé de prier Dieu : qui commandoit de par luy à son pere de l'emmener bien tost de Niort , s'il vouloit euitier vn grand malheur. Le pere obeissant à ces aduis, emmena son fils sur le midy de ce iour hors de Niort en vne maison appartenante à vn sien amy , distante d'vne lieue & demie de Niort : où il fut iusques au treiziesme de ce mois , qu'vn marchand de cognoissance s'en allant à Chastelleraut , l'emmena chez vn sien oncle cy-dessus nommé qui y demeure,

& fut ainsi parfaictement guery: ne s'estant du depuis en aucune façon ressen-
ty de cethorrible mal.

Pendant la maladie de cet enfant, vn
certain Dimanche sur le soir, en presen-
ce d'une grande quantité de peuple il
entre dans la chambre du malade vn
estran-ger, se disant Italien, bien cou-
uert, avec vn manteau d'escarlatte, &
l'espee au costé, lequel disoit estre venu
de deux cens lieues pour voir ce malade,
duquel il auoit entendu des choses pro-
digieuses: il s'approche du li-ct de l'enfant
qui se trouua en son accez, le considera
fort attentiuiement, & l'enquit lors que
ce mal l'eust quitté, d'où il venoit, ce
qu'il auoit veu & souffert: auquel il res-
pondit les mesmes choses qu'il auoit des-
ia repetees par plusieurs fois: cet estran-
ger estant en tel lieu qu'il ne pouuoit
estre enuifagé par le malade, & conti-
nua de s'enquerir de luy s'il cognoissoit
bien

bien ceux qui se trouuoient en ces lieux
 noirs: l'enfant respondit qu'ouy, & en
 nomma plusieurs deuant toute la com-
 pagnie: l'Italien continuant de luy de-
 mander, & le Vieillard barbe grise, qui
 est-il? le malade respond, *C'est le dia-
 ble*. L'estranger replique, s'il sçauoit
 bien que c'estoit le diable: cet enfant
 luy disant qu'ouy, il luy dit, Et moy ne
 m'y auez-vous point veu en ces lieux?
 Cet enfant tressaut, & se tournant vers
 cet homme le regarde fixement. Cet
 estrangeur auoit la face fort rude & gran-
 dement noir de visage, lequel se sepa-
 rant de l'enfant, dit au pere que son fils
 estoit vraiment enforcelle, & que si
 l'on vouloit, il auoit bien moyen de fai-
 re venir ceste forcierre: mais il luy fut res-
 pondu, qu'on ne vouloit auoir recours
 qu'à Dieu. Ceste circonstance a esté
 mise hors l'Histoire, le datte du iour
 qu'elle arriua n'ayant esté particuliere-
 ment remarqué.

Si ceste Histoire admirable pour estre
 creuë, eust eue besoin de tesmoins, le seul
 recueil des noms de ceux qui en pouuoient
 déposer, seroyent suffisans pour faire plu-
 sieurs gros volumes: mais la Verité co-
 gneue de tous ne pouuant estre contestee,
 & paraissant par plusieurs actes publics,
 il suffira pour oster tout le soupçon qu'on
 pourroit en auoir, d'adiouster icy les plai-
 doyens qui ont esté faits, & la sentence
 interuenue sur les dommages & inte-
 rests demandez par le paticier & sa fem-
 me au pere du malade, pour auoir esté ac-
 cusez par cet enfant de sortillege.

*PLAIDOYE' DE L'ADVOCAT
du Roy de Niort : Et la Sentence
intervenüe sur iceluy.*

EN l'audience demandee par Maître Iean Texier, & Pierre Coupris, Aduocat & Procureur de Iacques Morin, & Marie Chabot sa femme, demandeurs en presence de Maître Philippes Chalmot, & François Texier Aduocat & Procureur d'Anthoine Creusé, & Marie Fraigneau sa femme, deffendeurs, lesdits demandeurs ont propose leur demande, selon qu'elle est contenue par l'exploict de Ayrault, Sergent Royal, du cinquiesme iour de Iuillet, mil six cens vingt-huict, & dit que cydeuant, & au mois de Feurier dernier, Pierre Creusé, fils des deffendeurs, estant atteint de maladie & demance, entre autre extrauagances dont il vsoit en ses discours, proferoit plusieurs paroles inu-

rieuses & atroces, contre l'honneur & reputation desdits Morin, & Chabot, & de Françoise, & Catherine Morin leurs filles, aagees l'une de vingt-quatre ans, l'autre de six ans, & partant incapables de dol: disant, que transporté en corps & en ame hors de son liect, & de la maison dudit Creusé son pere, il voyoit ladite Chabot, & lesdites deux filles dans vn cercle, en compagnie de demons & mauuais esprits, avec lesquels elles dansoient, & faisoient autres actes qu'on dit estre communs aux forciers en telles occurrences, & outre que ladite Chabot, & lesdictes filles ne cessoient de le molester, & battre, pour ne vouloir adherer à elles, & se ioincre en leur compagnie, & que lesdites Chabot, & Morin l'auroient enforcellé par attouchement de sa personne, vn iour qu'il estoit allé querir des pastez en leur maison & boutique: & combien que ledit Creusé & sa

femme, d'eussent oster au public la cognoissance de la demance, & resuerie de leur fils, veu mesme que l'honneur desdits Charbot & Moriny estoit engagé & interessé: & neantmoins ils nous auroient requis nous transporter en leur maison, pour dresser vn procez verbal de la manie & rage, lequel auroit esté dressé à leur requeste, bien qu'ils ne l'ayent voulu signer par vn artifice & malice insigne, cuidans s'exempter des reparations honorables & pecuniaires enuers lesdits Morin & Chabot, lesquels ont creu auoir trop de suiet, de se plaindre de leur conuiuece. Et par ledit procez verbal qui est signé, & attesté de plusieurs personnes qui estoient lors presentes, sont referees lesdites paroles iniurieuses, & encores par plusieurs autres escripts, & libelles infames que ledit Creusé fils escriuoit, pendant lesdites extrauagances, & lesquels ont esté

femez en publicq par ledit Creusé, & sa femme, qui pendant l'espace de huit iours donnoient entree publique à tous ceux qui desiroient entrer en leur maison pour par ce moyen ternir la bonne fame & renommee desdits Morin & Chabot, lesquels bien qu'ils ayent iusques à huy vescu en gens de bien & d'honneur, sans aucun reproche, neantmoins ont esté tellement scandalisez en l'opinion d'un chacun qu'ils ont descheu de tout le credit qu'ils pouuoient auoir acquis, en la créance des gens de bien: & au lieu qu'auparauant ils auoient accoustumé de seruir de leur vocation le publicq, & les meilleures familles de cette Ville, & des bourgs circonuoisins, à present ils restent sans employ, destituez de tout moyen de gagner leur vie: Parquoy concluent à ce qu'attendu, que lesdits Creusé & sa femme, ne peuuent s'excuser de mauuaise foy & de dol, pour les

raisons cy-dessus, ils soient condampnez
 recognoistre iudiciairement, la Cour
 & plaids tenans, lesdits Morin & Cha-
 bot, & leurs filles, gens de bien & d'hon-
 neur, non tachez & soupçonnez desdites
 iniures, avec inionction de retenir leur-
 dit fils, & ne l'exposer en publicq pour
 proferer lesdites iniures, & deffences à
 eux, & tous autres de les dire ny publier
 en publicq ou en particulier, sur peine
 de la harp: & estre dit que ledit procez
 verbal sera tenu pour suprimé, & qu'il
 sera permis ausdits Morin & Chabot
 de faire publier le iugement qui inter-
 uiendra dans l'Audiance, & autres lieux
 publicqs de cette Ville, pour reparer la
 diffamation publique. Et outre con-
 damnez en la somme de mil liures, pour
 la reparation pecuniaire, aux domma-
 ges, interrests & despens de l'instance.
 Lesdits deffendeurs on dit qu'ils font
 formelle denegation de nous, auoir re-

quis, ny autres Officiers, d'aller en leur maison, n'y dresser procez verbal de la maladie de leur fils, ains seulement appelé les Medecins, Chirurgiens, Apoticaire pour le traicter en la maladie: & que ce qui est exposé en l'exploict de ladicte demande nous regarde plustost que lesdits deffendeurs, qui n'ont iamais dit ny proferé aucunes iniures contre lesdits demandeurs, ayant tellement esté affligez de la maladie de leurs fils, qu'ils auroient esté visitez en leur affliction par plusieurs de leurs amis & voisins, & partant concluent à estre enuoyez de leursdites demandes, fins & conclusions, avec despens, dommages & interrests. Le Procureur du Roy comparant par Maistre Iean Andouart Aduocat de sa Majesté, a dit. Que les demãdeurs en requeste ont de verité notable interrests de purger le soupçon du crime de sortillege: mais que le plus souuent il arriue que ceux qui
taschent

taschent d'en oster l'opinion l'augment,
 le semblable est à craindre au fait
 qui se presente, veu le peu subiect qu'ils
 ont eu d'intenter cette action contre les
 defendeurs, qui mesmes sembleroient ex-
 cusables quand ils se seroient rendus par-
 ties formelles contre iceux demandeurs:
 Mais pour faire voir au public que le
 tout a esté très-iuridique, ils estiment
 estre obligez, pour le deu de leurs char-
 ges, d'en representer les circonstances
 en vne occurrence de telle & si grande
 consequence, pour tascher de descou-
 urir vn crime si atroce: & pour le faire
 voir qu'il estoit à remarquer, que sur
 l'aduis qu'ils auroient eu qu'un certain
 ieune homme de l'aage de quatorze ans
 estoit atteint d'une maladie extraordi-
 naire & surnaturelle, que les Medecins
 presumoient estre causee de malefice,
 duquel mesme il se plaignoit, & en
 nommoit les auteurs, ils nous en au-

roient remonstrez la conséquence, & combien il estoit nécessaire pour le public, de tascher à descouurir vn tel crime. Ce qui auroit fait que nous nous serions transportez en leur presence en la maison où ce ieune homme estoit detenu, lequel nous aurions rencontré en vn sens fort rassis, bien composé de son esprit, sans aucune alteration, qui discouroit en termes assez discrets de son mal & de ceux qu'il presumoit luy auoir causé ce malefice: Mais quelque temps apres l'on vit des mouuemens si extraordinaires, qui ne pouuoient estre produits, ce sembloit, par des agens naturels: car outre vne extension de bras, & roulement d'yeux effroyablés, & vn renuersement de leures, on luy vit eleuer vne main en haut si roide, qu'elle estoit inbranlable, & de l'autre designer quelqu'un, & le monstrez au doigt: & bien qu'il ne vist en aucune

façon; & qu'il fust fans sentiment en toutes les parties de son corps (ce qui fut esprouué en quelques vnes, où il ne pouuoit y auoir de la feinte) si est-ce neantmoins qu'il escriuoit, & par les escrits designoit ceux qu'il accusoit de son malefice: quelquesfois on l'a veu ietter les bras, comme pour chasser quelque chose qui luy caufoit de l'horreur; ietter des cris fort estranges & effroyables: porter vne fois ses mains pres de sa bouche, comme pour se deffendre de quelqu'un qui taschoit de luy rompre les doigts: & apres on a veu que ses mains sembloient estre poussees de violence, & apres restoient immobiles & sans pouoir estre esbranlees: & que les Medecins & Chirurgiens qui l'auoient veu premier que nous nous transportassions en ceste maison, ont rapporté de plus qu'il auoit contrefait à diuerses fois la voix de cinquante sortes d'animaux au

naturel, qu'il contrefaisoit auffi diuerfes
 sortes de mestiers, iouoit de plusieurs
 instrumens, dançoit en perfection, bien
 que du tout il n'eust rien sceu deuant sa
 maladie, se traismoit sur le dos, & alloit
 de la sorte, & plusieurs autres actions
 estranges qui se voyent en leur rapport
 & au procez verbal. Quelque temps
 apres nous vismes, qu'estant retourné
 comme d'un profond sommeil & d'un
 assoupissement, il se plaignoit des gran-
 des douleurs qu'il auoit supportees mes-
 mement es parties, où pendant ces illu-
 sions il s'imaginoit estre attaqué, & ra-
 contoit en suite qu'il venoit d'un lieu
 fort tenebreux & obscur, où il auroit
 esté grandement outragé par des fem-
 mes qu'il designe, qui sont les femmes
 & filles de Morin de ceste ville, & quel-
 ques autres qui mandient: & de plus di-
 soit, qu'il croioit son mal proceder de
 ce qu'un iour ayant porté vn pasté re-

chauffer chez les demandeurs, la femme luy ayant frappé d'un coup sur la teste, il sentit quelque douleur, & que depuis il auroit tousiours esté indisposé: Toutes lesquelles circonstances ils estiment estre remarquables en trois poincts rapportees: qui sont ces illusions, ces mouuemens extraordinaires, & la declaration de ce ieune garçon en sens rassis: pource que l'apparence est tres-grande que les deux premiers peuuent proceder d'un esprit malin, & par un sortilege, & que le dire de cet enfant n'est point à mespriser en un crime si qualifié comme est le sortilege. Pour les illusions, voicy ce qu'on peut dire allenecontre, que ce ne soit qu'imagination chimerique que peut causer la maladie: que de dire que lors que ce ieune homme s'imaginoit estre transporté en en ces lieux tenebreux: Cela fut veritable, il est contraire au sens commun:

Omnia magis coniectare oportet, quam hanc licentiam animæ sine morte fugitiue, disoit Tertulian : Ce transport ne peut estre fait par les demons, comme l'antiquité l'a creu autres fois d'Aristeus & Cleomede; d'autant qu'il n'appartient qu'à Dieu de remettre & restituer vne nature ja destruite, comme est celle de l'homme, lors que l'ame en est hors, ny aussi son corps, puis qu'il a esté veu continuellement : De dire que ce fut vne extase, que Dieu voulust faire recevoir à ce ieune garçon pour descouvrir vn crime, aussi peu d'apparence : que celle-cy se fait quand Dieu, qui vient en nous, par sa toute-puissance esmeut nostre intellect tout diuin, & eslance nostre ame à la cognoissance des choses surnaturelles par la subtraction des sens, dit Sainct Thomas, mais d'autant qu'elle procede de Dieu, qui est la source des plus pures lumieres : aussi les cognois-

fances qui en viennent, sont claires & intelligibles, sans effroy, sans violences, telles qu'estoient celles des anciens Prophetes, & celle de Saint Pierre, qui vit (aux Actes des Apostres) vn linceul plein de toutes sortes d'animaux, pour designer la vocation des Gentils au Christianisme, & non pas par des tortures, par des violences, comme se plaint ce garçon : Et ainsi est evident, & il en faut demeurer d'accord, que ces discours de cet enfant sur son transport, ne viennent que d'illusions, qui blessans sa fantaisie, luy imprimoient ces fausses especes, lesquelles illusions pouuoient naistre, ou d'une cause naturelle, ou si elles tenoient de l'esprit malin, ce pouoit estre par le moyen de la maladie causee naturellement sans aucun malefice precedant : Or que les illusions puissent naistre d'une cause naturelle, il en apparroist en ce que de tous nos sens in-

terieurs ou exterieurs, aucun n'est plus
 subiet à deception que nostre imagina-
 tiue, qui se trouble souuent par des ma-
 ladies : & les Medecins, qui l'ont logee
 en la partie interieure du cerueau, attri-
 buent les causes de la deprauation d'icel-
 les aux humeurs crasses & fuligineuses
 qui sont excitees par la melancholie;
 ainsi la conionction estroite qui est
 entre nostre ame & nostre corps, font
 qu'elle se ressent de ces maladies quel-
 ques fois iusques à tel poiuct que l'intel-
 lect mesme s'en depraue, suiuant les di-
 uers degrez d'adustion & de l'humeur
 atrabilaire: voila pourquoy les illusions
 de ce garçon pouuoient naistre d'une
 cause naturelle, que si ces mouuemens
 si extraordinaires ne pouuoient estre na-
 turels, on peut dire qu'ils se pouuoient
 faire par le demon sans fortilege: car
 ainsi soit que dans le monde les demons
 se plaisent dans les orages & dans les
 horreurs

horreurs des tenebres : ainsi dans l'homme, qui est le petit monde, ils se glissent quelquesfois dans les passions turbulentes qui causent les maladies dans l'atrabile, & dans l'humeur noire de la melancholie : Ce qui fit qu'Aristote en ses problemes attribuoit tous ces mouuemens, que nous estimons demoniaques, à la seule humeur melancholique, non pas qu'il faille croire que chaque maladie ait son demon, comme croient les Gnotistes : Mais neantmoins il arriue en plusieurs, & mesme Orebace l'un des plus grands Medecins qui ait iamais esté, estimoit que l'Ephialte, maladie assez vulgaire, n'estoit point sans vn demon : c'est ce qui fait que dans les maladies, des gens idiots parlent des langues incogneues, ont des actions outre le cours de la nature, telles qu'on peut dire qu'a eu cestuy-cy, duquel aussi on ne peut qu'on n'aduoue qu'il y en a eu

beaucoup qui n'ont autre cause que naturelle, comme ce renuersement de corps, ceste extension roide de doigts: & d'autre qui se peut faire par vne humeur maligne du cerueau, laquelle se glissant aux muscles spinaux faisoit vn tetane par l'obstruction des parties nerveuses & voyes des muscles, comme les Medecins ont en partie recognu: Que s'il y a d'autres actions surnaturelles, comme ceste imitation des voix des animaux, & les autres, elles pouuoient estre sans malefice par ceste raison predite. Quant à ce que dit ce ieune enfant, on peut dire que sa declaration ne peut estre tiree en consequence, soit que l'on considere ce qu'il a dit & escrit pendant ses illusions, soit ce qu'il a dit en sens rassis: car pour ce qu'il a dit en sa maladie, ou son mal procede de causes naturelles, & ainsi, *velut agri somnia vana finguntur species*, il est plus digne

en ce cas de commiseration, que capable d'accusation: que si son mal est fait surnaturel par le demon, qui a neantmoins sa source en sa maladie: les prestiges d'un esprit malin, ne conuainquent pas un innocent: & ne peut on dire que son mal soit prouenu du fortilège de ceux qu'il accusoit par les escrits, car si ainsi eust esté, l'esprit malin qui agissoit par leur moyen n'eust pas descouvert leur meschanceté: voila pourquoy si le demon s'est glissé parmy le mal de ce jeune homme, l'innocence de ceux qu'on veut soupçonner par ces escrits est apparente; puis que cet esprit les accuse, qui estant calomniateur dès son commencement, ne tasche qu'à destruire les innocens, & non ceux qui sont des siens. Que si l'on considere la plainte de ce garçon en sens rassis, elle n'est considerable d'un enfant, d'un impubere, qui n'est ny capable d'ac-

cusation ny de tesmoignage; Ce sont des raisons qu'on peut dire allencontre de ce procez verbal, & de toutes les procédures qui ont esté faictes, & de ses illusions, & de ses mouuemens extraordinaires, & de sa declaration, lesquelles neantmoins, quoy que veritables en parties, ne sont pas que ce n'aye esté du deub de nostre charge, de dresser vn procez verbal de ce qui s'est passé, car bien qu'on demeure d'accord que l'imaginatiue de cet enfant se soit imprimée de fauées especes, que son transport soit vne illusion, & que le demon se peut glisser dans les maladies, pour causer des actions extraordinaires, si est-ce neantmoins que l'apparence est plus grande, que le tout soit procédé de malefice & sortilege au faict qui se présente, veu la plainte de ce ieune garçon, qui mesme en son aage n'est poinct à reietter, attendu que le crime d'ot il s'agit est de leze majesté Diuine

auquel cas tous les Docteurs tiennent qu'un
 enfant peut déposer, *In hoc crimine priui-*
legiato mulier, impuber, infamis admit-
tantur, soli inimici capitales repelluntur;
quia est impedimentum iuris naturalis.
 Aussi qu'en suite de qu'il se plaint, on
 void l'effect de sa plainte en vne maladie
 extraordinaire, où le malin esprit peut
 agir de verité, sans sort: mais ce n'est pas
 à la iustice de discuter si cela se peut fai-
 re par vn esprit malin, sans l'administra-
 tion de ceux qui s'aydent du sortillege,
 il suffit que l'apparence soit de malefice
 pour en receuoir la plaincte, comme icy,
 où les Medecins recognoissent la mala-
 die surnaturelle. Le crime de sortillege
 est si grand, si enorme, & offence telle-
 ment la Majesté Diuine, qu'on peut dire
 que c'est le solstice de tous les maux,
 puis que le plus grand de tous est de
 hayr Dieu, & que ceux qui s'aydent de
 sortillege non seulement le hayssent:

mais le blasphement continuellement, & pactissent avec son ennemy. Voila pourquoy il ne faut oublier aucunes circonstances pour descouvrir ceux qui commettent de si enormes meschantez, pour la punition desquelles Dieu fait des merueilles surnaturelles, & les decouvrirroit extraordinairement, si ceux qu'il a constituez pour en faire la recherche ne si monstroient negligens, & où mesmes les demons accusent ceux qui vsent de ses actes detestables, les complices se deferent eux mesmes, & tout coniure la ruine de ces miserables. De plus les demandeurs se plaignent sans sujet, on n'agist pas par ce procez verbal à vne conuiction de ce crime, on ne leur fait pas à present leur procez sur iceluy, mais de dire que sur vne plaincte d'un malefice apparent, sur vne maladie extra-ordinaire, telle recognue par les Medecins, on n'ayt deu en rechercher

les Autheurs, c'est vouloir entreprendre sur le deuoir de la iustice, & apporter vne precaution, qui peut d'autant plus augmenter le soupçon. Et ce qui est encores remarquable, c'est que cette femme de Morin en est soupçonnée, elle à partie de la voix du peuple contre elle, & mesme a eu dans ce Siege diuers procez pour auoir esté appelée forcierre, & on dit que sur tout en ce crime, *Fama vicem accusatoris obtinet*. Et puis que c'est vn crime, dont la preuue est souuent difficile, toutes les circonstances qui le peuvent faire descouurir, ne se doiuent negliger. Icy outre la plainte, on void vn malefice par vne maladie extraordinaire. Vn soupçon sur vne personne peut estre tache par son mal-heur, peut estre aussi par la verité. On ne voit rien véritablement de certain: mais cela ne fait pas que ce n'ait esté de nostre charge de tacher d'en descouurir la verité: & neant-

moins pour monſtrer qu'on n'auoit intention de les ſcandalifer, Nous aurions ordonné que le procez verbal demeureroit par deuers nous, iuſques à ce que cette verité fuſt plus à plain recogneue, & il ny a que les demandeurs qui en donnent la cognoiſſance, par ce qu'ils ont fait plaider: ce qui a fait, que eux qui parlent ont eſté obligez pour le deub de leurs charges de representer ce que deſſus, lesquelles, bien qu'elles les exceptent de la calornie, *Cum Aduocatum fiſci qui intenſionem delatoris exequitur in omnibus officiij neceſſitas ſatis excuſet leg. poſt, legatum, ff. quibus ut indignis.* Et que ainſi ils ne ſoient obligez de rendre raiſon de leurs intentions, neantmoins ils ont deſiré les faire paroître iuſtes & equitables, & que ſans ſubieſt les demandeurs ont fait cette demande, & partant requiert que les deſſendeurs en ſoient renuoyez.

Sur quoy parties ouyes, nous auons
enuoyé,

enuoyé, & enuoyons les deffendeurs de la demande à eux faicte, & si auons condamné les demandeurs és despens de l'instance. Si donnons en mandement au premier Sergent Royal, sur ce requis, de mettre ces presentes à deuë & entiere execution, selon leur forme & teneur en ce qu'elles le requierent. Donné & fait en la Cour extraordinaire de la Senechaussee de Poictou, au Siege & ressort de cette Ville de Niort, y tenue par nous Pierre Rousseau, Escuyer Sieur de la Place, & des Mortiers, Conseiller du Roy nostre Sire, Lieutenant General, Ciuil & Criminel en ladite Senechaussee, Iuge, Preuost, Chastellain par reunion, & Commissaire examinateur au dit Siege, le vingtiesme iour de Iuillet, mil six cens vingt-huiët. Ainsi signé, VASLET, Greffier. Et scellée.

Icy devons nous encore ce trait
à l'histoire que, Anthoine Creusé, ayant
chargé de son affaire Maistre Philippes
Chalmot, Sieur de la Briandiere, Aduo-
cat au Siege Royal de Niort, & luy ayant
donné quelques pieces pour l'instruction, il
y eut un grand bruit & tintamarre en
la maison dudit Chalmot, par l'espace de
huiet iours, ce qui a esté entendu, & sceu
de tout le voisinage, & cessa tout aussi tost
que ledit Aduocat eut rendu les papiers.

CERTIFICAT DES

Medecins & Chirurgiens.

NOus Jacques Fraigneau Docteur en
 Medecine, & Pierré Ferré Mai-
 stre Chirurgien demeurans en cette Ville
 de Niort, certifions à tous qu'il apparten-
 dra, que par Vertu de Jugement cy-deuant
 rendu par Monsieur le Lieutenant Gene-
 ral, Civil, & Criminel de cette Ville, à
 nous signifié les vingt trois & vingt
 huitiesme iour de Mars, mil six cens
 vingt huit, par Pasquet, & Chaudel-
 lier Sergens Royaux, auons esté contrainct
 de rapporter ce qu'auons veu en la mala-
 die extraordinaire de Pierre Creusé, aagé
 de treize ans dix mois, naturellement de
 poil noir, & de couleur blesme, d'esprit bon
 & gentil, estans appelez par Anthoine
 Creusé pere, demeurant en cette Ville, le
 vingt huitiesme iour de Ianuier de l'an

courant, l'auons trouué estendu sur un
 liët, sans fiebure, son corps Uniuerselle-
 ment rigide & roide par un tetanus,
 imitant tantost l'episthotonos, tantost
 l'emprosthotonos, & tournant les bras en
 arriere faisoit au coude une flexion contre
 nature, muet & priué, (comme en tous
 ses acces que nous l'auons veu) de tout
 iugement, & de tout ses sens naturels,
 iouant par fois de la teste, la iettant plu-
 sieurs fois brusquement en auant & en
 arriere, puis d'un costé sur l'autre, puis la
 tournoit de grande vitésse sur son col, ces
 trois mouuemens consecutifs cessez ses
 sourcils se mirent plusieurs fois haut &
 bas, les paupieres immobiles & closes:
 incontinent apres ce il faisoit la mouë, al-
 longeant & renuersant les leures, inconti-
 nant un ris canin, tost apres la bouche
 mediocrement ouuerte tournoit vitement
 la langue entre ses leures, & la tiroit &
 dedans & dehors: tost apres ouuroit les

yeux fort affreusement comme toniques : puis en un instant les tournoit & rouloit d'une indicible vitesse : puis après mouuoit la gosier seul, puis l'esternon, voire tout le thorax se surhaussait & se baissait comme si quelqu'un estant dessous l'eust poussé dehors, & attiré en dedans : puis tout à coup l'abdomen ainsi que le thorax : puis un tremblement de pieds. Toutes ces actions se faisoient sans delay l'une apres l'autre : deux n'apparoissans iamais en mesme temps ; lesquelles finies il sembloit dormir, & de là reuenoit à soy, & se plaignant de grandes douleurs ; en inuoquant Dieu, & priant les assistans de ne s'esloigner point de luy, & de le garder.

Le iour ensuiuant y fusmes appellez avec Messieurs le Goust & Marsac, Docteurs en Medecine, & le trouuasmes auoir les mesmes symptomes que nous auons declares : & apres auoir use de nos remedes, & esté euasqué d'humeurs fort

fetide & puantes au possible, il ne laissa pour cela d'estre exercé de ses maux par plusieurs & diuerses fois: quelques iours durant avec peu de treue entre deux paroxismes: apres lesquels il eut dix ou onze iours d'intermission: durant lesquels il fust sein & gaillard comme n'ayant point eu de mal.

Item fusmes appelez un autre fois, ascauoir, le quatorziesme iour de Feurier suivant, à la visite dudit Pierre Creuse, & le trouuastes en son paroxisme, en asseant sur son liect, qui apres auoir tiré à luy en son giron toutes ses couuertes, à pieds descouverts, sembloit iouer de l'espinette sur les doigts de ses pieds: & apres auoir fait quelque temps cette action il battoit du doigt index de chacune main sur le gros doigt de chacun pied: ce qu'ayant faict quelque temps il prenoit tous les doigts de chacun pied, & apres les auoir tous mis les uns sur les autres vers le gros, tout

brusquement les deffaisoit tous, & incontinent retournoit le plus petit sur son voisin.

Item Une autre fois visité par nous fut trouué en son paroxime couché sur le costé gauche assez placide, & sans action: & apres l'auoir consideré quelque temps, il donna tout brusquement en l'air quelques coups de poings de la main droicte: & puis renuersant la face en bas contrefit sans mouuoir les leures la voix de quarante animaux diuers, asçauoir, premierement le poulet, (car il commençoit tousiours par là) la poulle, le coq, la gruë, la perdrix, le chathuant, la chouette, le pigeon, le chat, le cheual, l'asne, la vache, le bæuf, la cheure, le cheureau, la brebis, & plusieurs autres aussi naïfvement que si c'eust esté les animaux mesme: contrefaisant ces voix, il faisoit par fois des pauses, durant lesquelles il donnoit des coups de gourmade contre son liect:

puis continuoit ces voix : apres lesquelles sautant en la place, il alloit en un certain coing de la chambre, ou relevant son bonnet de dessus le creux de son oreille il sembloit escontera: pres ce, il designoit du doigt sept choses l'une apres l'autre, & apres ce compte, il retournoit encore prester l'oreille au mesme coing: ce fait allant où il auoit commencé son conte il y baisoit la main, puis se mettant au milieu de la place faisoit une humble & basse reuerence, & ostoit son bonnet, (lequel il iettoit par fois comme en cholere tenant par trop sur sa teste) & rebaisant la main sembloit la bailler à quelqu'un, & dansoit aussi mesurement qu'un bon danseur: derechef, apres auoir dansé quelque demy quart d'heure il alloit au mesme lieu prester l'oreille, & faisoit comme auparauant, suiuoit l'ordre du nombre qu'il auoit fait, iusques à six fois, à chacune un bransle diuers: à la septiesme fois dansoit en rond,

ou par fois il sembloit faire sauter quelque chose dessus ses mains: apres ces dāses, s'estāt quelque peu promenē par la chambre en cette posture, comme contraint, se courboit & ployoit, mettant la teste entre les cheuille des pieds, tenant des mains ses iambes, puis les laissant faisoit des mains & des poingts les actions de celuy qui se deffenderoit, & se gourmoit: & incontinant apres tordoit & renuersoit les bras, iettant de grands cris effroyables inarticulez: puis esleuant son corps sur la teste faisoit le chesne fourchu, & se laissoit choir sur son dos: & apres y auoir demeurē quelque peu immobile il se mouuoit ainsi, premierement les iambes tiroient les cuisses, les cuisses tiroient le corps, le corps tiroit la teste d'environ dix pieds, puis faisant un mouuement contraire la teste tiroit le corps, le corps tiroit les cuisses, & les cuisses les iambes de mesme longueur: puis se tournant à contre sens: mit les deux

mains sur le plancher, ne le touchant que
 de quatre doigts, aſſauoir de deux de cha-
 cune main, le poulce, & l'indice: les eſlar-
 giſſant l'un de l'autre, & ayāt en cette po-
 ſture paſſe entre ſes bras tout ſon corps une
 fois en auant, une autre fois en arriere,
 ſans iamais mouuoir ſes doigts de leur pla-
 ce, il ſe leua debout, & ſe promenant par la
 chambre, ſ'il rencontroit quelque choſe mo-
 bile & portable la iettoit par deſſus ſa te-
 ſte, ſi quelque perſonne il la contraignoit de
 ſuiure ſes mouuemens, ou bien la battoit
 ſi elle ne ſeſquiuoit de ſes mains: mais ſi
 quelque choſe mobile & bien tenante
 apres quelques efforts la laiſſoit.

Item nous le viſmes une autre fois
 eſtans aſſis en la place, où il ſembloit
 faire les aſſions de celuy qui iouē du vio-
 lon, en apres de la baſſe, remuant les
 doigts de la main gauche, comme ſ'il euſt
 frappé des cordes, & de la main droicte
 comme tenant un archet, pouſſe ſur les

mesmes cordes, les accordant par fois, en serrant & pressant les chevilles & dessus & dessous: puis incontinent apres: de celuy qui iouë de la cornemuse: puis se leuant brusquement semblant ietter sur son espaulle une bandolliere, il alloit par la chambre comme celuy qui battoit un tambour: puis apres faisant comme celuy qui se desuest d'une bandolliere, il la iette en terre en cholere, faisant la mouë, grinsant des dents, iettant quelques gourmades: apres cela il retournoit encores audit coing prester l'oreille, & dansoit ainsi que nous auons dit: apres ses danses il nous sembla qu'il se laua les mains, les essuia, & se mettant en terre sur ses fesses fit toutes les actions d'un paticier: apres auoir encore presté l'oreille, tuant, plumant esuentrant, tranchant paistrissant, faisant un rond de pasté, & autres actions semblables: & de là retournoit à ses danses.

Et de là estant reuenue à soy, comme

nous nous y rencontrions par fois, si on luy demandoit quel estoit son mal, il nous disoit qu'il estoit en un moment transporté en un lieu fort loing & fort obscur, où il voyoit sept femmes & un vieillard qui iouoit du violon, desquelles femmes deux courroient apres luy, qui l'atrapans le battoient tant & plus, luy tordans les bras pource qu'il ne vouloit pas contre faire la voix des animaux qu'elles luy presentoyent apres leur auoir faict faire une voix seulement à chacun, ny iouer des instrumens, ny faire les ouurages de patissier: pour ce qu'il disoit ne les sçauoir faire.

Item appelez une autre fois par le mandement de Monsieur le Lieutenant, le trouuant en son paroxisme, muët, & priué de ses sens comme cy deuant: à cette mesme heure un Maistre Chirurgien rapportant avec nous, luy pressa les parties honteuses: & n'en fait estat non plus qu'une pierre: luy vismes faire des gestes

comme s'il eust veu quelque chose au tour
 deluy, tournant promptement son visage
 d'un costé & d'autre: puis sembloit se-
 couer, & prendre quelque chose de dessus
 luy de laquelle il estoit effrayé: & puis es-
 crivit plusieurs choses (la cognoissance
 desquelles peut estre apprise par le procez
 verbal que en fut lors fait,) nous luy auons
 bien veu faire d'autres escripts en forme
 de priere à Dieu, qui sont es mains de son
 pere, lequel reuenant à soy il noit les
 auoir faicts, disant qu'il escriuoit mieux
 & plus droit: & qu'au pays d'où il venoit
 il n'y auoit ny plume, ny ancre, ne papier:
 se resouenant bien pourtant du mal qu'il
 y auoit enduré, & de tout ce qu'il y auoit
 veu.

C'est ce que nous certiffions veritable.
 & disons, donnant nostre aduis des cau-
 ses, que toutes actions deprauees sont cau-
 sees de plusieurs humeurs & diuerses, les
 vnes obstinans les nerfs ou par leur sub-

stances, ou par l'influence de leur vapeur grossiere faisoient le titane : Les autres par leur accrimonie poignant les nerfs causoient les actions particulieres deprauees: Les autres offusquans & obtenebrans les esprits animaux pouuoient engendrer la deprauation du iugement & de la fantaisie: & estimant auec Hypocrates qu'en certaines maladies ὅτι τοῦ θεοῦ τι, Diuinum quid & supra naturam. Digne de contemplation, nous raportons la cause de certaines actions à deux esprits, l'un bon, l'autre mauuais: par le bon il prioit Dieu, redigeant par escript ses prieres: par le mauuais, estoit priué de iugement, de sens & de paroles, ayant mouuement. Faict en cette Ville de Niort, le vingt-huictiesme iour de Mars mil six cens vingt-huict. Ainsi signé,

I. FRAIGNEAU Docteur en
Medecine, & P. FERRE

*CERTIFICAT DE I. DE
Coignac Ministre de la Parole de
Dieu en l'Eglise de Niort.*

IE soubigné Ministre de la parole de Dieu en l'Eglise Reformee de Niort, ayant esté appelé par maistre Anthoine Creusé marchand audit Niort, & Ancien de l'Eglise Reformee recueillie au mesme lieu, pour visiter Pierre Creusé l'un de ses enfans, aagé de treize à quatorze ans, affligé d'une maladie estrange & à moy inouïe, m'y transportay le seiziesme iour de Feurier de ceste presente année mil six cens vingt-huict, où ie vy & remarquay tresbien en la personne dudit Pierre Creusé, les choses desquelles ie rendray tesmoignage à la requisition dudit sieur Creusé pere, lequel m'en a demandé le present acte. D'abord ie rencontray ledit patient sans veue, ny ouye, ny parole, ayant cependant toutes sortes de mouuemens & demarches mesurees, comme à la cadence, qu'il n'auoit (à ce qu'on dit) iamais apprises, & sembloit bien qu'il creust estre en compagnie de bal, en ce qu'il alloit tousiours en certain lieu prestér l'oreille, comme si on luy eust dit quelque secret à basse voix: puis designoit du doigt plusieurs places, comme s'il eust conté plusieurs personnes assises en ordre iusques au nombre de sept; finalement baisoit la main & la presentoit à vne des extremittez de la chambre, & ayant le bras estendu, la main fermee, se tiroit en place comme s'il eust mené quelqu'un au milieu d'une danse, ac-

compagnant son action de toutes les reuerences
& autres honnestetez de gestes & de contenance
qu'on a accoustumé d'observer en tels badinages:
& fit cela grand nombre de fois l'espace de deux
heures ou plus, que ie m'arrestay à le considerer
auec beaucoup d'esbahissement: Ce qui m'eston-
noit le plus, est qu'il ne reiteroit point deux fois
vne mesme danse, ains tousiours de nouvelles: &
combien que la chambre fut garnie de tous costez
de chalits, tables, bancs; tabourets, & chaires,
ayant des mouuemens si vifs & si brusques, sans
tastonner ny sonder, quoy qu'il eust les yeux tous
clos, iamais pourtant il n'alla heurter contre au-
cune chose: en suite il sembla qu'il se mit en cho-
lere, qu'il voulut frapper quelqu'un, donnant plu-
sieurs coups de poings en l'air, se tenant en postu-
re pour combatre, & poursuivant comme si vn
autre eust recule, deuant luy: mais en fin, il sem-
bla estre vaincu, couché par terre, ployé en plo-
ton, les bras torts & renuersez, iettant d'horribles
cris: lors nous vismes en luy d'autres mouuemens
plus estranges que les premiers: cheminer sur la
teste & les deux genoux, tellement que la teste de-
marchoit comme vn pied: passer tout entier sous
ses deux bras, touchant au pauié de la chambre de
l'extremité du poulce & du doigt index, ramper
sur le dos, comme vn ver par extension & contra-
ction: quelquesfois les pieds premiers, & quel-
quesfois les pieds emportez par la teste: apres ce-
la le corps s'arrestant tout estendu la face en haut,
voicy naistre d'autres mouuemens de plusieurs
parties l'une apres l'autre: le front & les sourcils

commencerent se retirant haut & bas vers les yeux & vers la teste alternatiuement, d'une grande soudaineté; puis les yeux se prirent à rouer dans leurs creux comme vne piroquette, n'ayant toutesfois sentiment quelconque, comme nous le recogneusmes en touchant la prunelle du bout du doigt sans qu'il s'illast: la langue suiuit les yeux, tournoyant tout de mesme: la gorge apres la langue rendoit vn son comme de deux pierres frappees l'une contre l'autre: le tout vint à l'estomach, qui s'esleua promptement en haut comme vne grosse vague au dessus de l'eau: les pieds en eurent aussi leur part tous les derniers, de chacun desquels il tira trois ou quatre ruades imperueuses, puis se tindrent roides. Tout cela s'estant passé, chacun iugeoit que ce mal ne procedoit point de cause naturelle: ie ne souscriuy point absolument à cela, & ne le contredis aussi: mais de quelque part que ces accidens vinssent, ie dis que l'origine n'en estoit point incognue à Dieu, lequel sonde tout ce qui est recelé es cachettes de la nature, & descouure semblablement les profondeurs de Sarran, qu'il falloit s'adresser à cestuy là qui estend son pouuoir à toutes les choses impossibles à l'homme, & bride tellement la puissance des enfers, qu'il n'y a point d'enchantement contre Iacob, ny de deuinement contre Israel. Nous auions dilayé de faire la priere, attendans que le malade reuint à soy pour estre fortifié de nos consolations, & de dire Amen à nos oraisons: mais voyant la longueur de cet accez, nous ployasmes les genoux deuant Dieu le supplians de despleyer le

merueille de sa puissance & de sa misericorde selon la promesse qu'il a faite à tous ceux qui se vouent à luy, & qui l'inuoquent: après que nous fumes releuez de nostre priere, le malade qui s'estoit aussi redressé sur ses pieds, & s'estant promené quelque temps par diuers lieux de la chambre, vint s'arrester finalement au droict de la cheminee, où il demeura immobile & roide comme vn tronc planté en terre, sans vſage d'aucun des sens: ayant esté en cet estat enuiron vne heure, il forma sa main droicte, & agença ses doigts comme pour escrire, & estendit sa main gauche comme pour luy seruir de papier. Le m'approchay lors pour recognoistre s'il formeroit quelques lettres qui se peussent lire, & remarquay qu'il escriuit par deux ou trois fois fort distinctement le nom de *Morin*: puis il se couche à terre, & ayant estendu vne des bastes de son pourpoint, y escriuit derechef le mesme nom plusieurs fois & en diuerses formes de lettres; depuis ce iour-là ie l'ay veu souuent, soit en acciez, où il continua de faire diuerses choses, soit hors de l'acciez, où il nous rapportoit auoir eu des visions & illusions toutes conformes tant à ses gestes, comme à ses escrits: on s'aduisa de luy mettre vne plume entre les doigts, & luy presenter du papier, à quoy il obeist, combien qu'il n'eust veue ny sentiment, mesme qu'il eust les yeux clos & la face tournée d'un autre costé, il ne laissoit d'escrire: par ce moyen on cogneut encore mieux ce qu'il affermoit, qui estoient des plaintes contre certaines femmes qu'il nommoit & accusoit de le tenir en ceste misere,

des menaces contr'elles , tant du iugement de Dieu, que de la iustice des hommes, des contestes contre le diable qui sembloit luy donner diuerses attaques, des exclamations és douleurs & horreurs qu'il souffroit, des prieres à Dieu conceues tousiours en fort bons termes, exprimant vne passion merueilleuse à rechercher son ayde & son secours en luy ; ce que i ay veu avec plusieurs autres tesmoins à diuerses rencontres : En foy de quoy i'ay apposé mon seing à ce present recit, pour seruir audit sieur Creusé qui l'a desiré de moy, selon qu'il sera de raison, le trentiesme iour de May mil six cens vingt huit ; ainsi signé **I. DE COIGNAC.**